

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
APR 29 1940

87

7 3148/0.82 7

山西通志卷第二百七

哈佛大學漢和
圖書館珍藏印

山西巡撫都察院右副都御史臣覺羅石麟奉

旨修輯

藝文二十記七

明

臯陶廟記

韓文

洪洞縣南十里有虞士師臯陶氏廟在焉為堂三楹庭稱之
規度卑隘非直無以容俎豆崇吉蠲而庭與堂久傾圯弗治
嘉靖癸未秋巡按御史萊陽王公秀過而陋之乃擘公帑之
餘若干緡以授平陽府推官喬年董縣之主簿王埤新之為
享堂一視昔加崇焉為內外庭二廣視昔修倍之為重門一
為綽楔於通衢又一則視堂若門之宜以為之制而總署曰

有虞士師之廟廟成謁記於文文惟士師古明刑官也古之刑非侈爲條約待其入而敝之如今之爲也有教之道焉教者何君臣父子夫婦長幼朋友之倫也古之君如堯如舜如禹皆慎徽敦典以端是教於上而下之爲臣者惟明夫孝友睦婣任恤之刑以弼是教之行耳臯陶之謨曰慎厥身修思永敦叙九族意蓋可見矣斯義不明世之人遂有薄倫理騁囂訟以犯於有司者矣甚或出其不逞之辭以邀庇於神幸而售焉則曰神誠予副也則操壺榼羣巫覡以醉且嬉於廟而卒莫有悟焉嗚呼教之不明一至此哉聖人過化之邦固亦有是耶御史氏過平陽旣新堯舜禹廟器茲復出其餘以新斯廟豈惟致其力於一代君臣殷祀之間哉亦示之教耳教之興則民之興可卜矣紀其事而繫之以歌且曰使後之

執裸奠於斯廟者聞臯陶之德如將見臯陶焉歌曰惟天生民若有恒性哉惟辟奉天厥性之盡哉惟臣佑辟惟刑之慎哉性之弗盡教曷成教之弗成刑何型在昔先民惟性之明惟性之明惟教之興惟教之興刑期無刑哉惟彼陶唐有此冀方春秋報祀曰此方之常我祀旣辰我廟旣新匪神之私惟爾教之陳爾教旣陳爾民旣新惟從欲以致休於神神歸乎來哉惠此方之民哉

增修堯舜禹廟碑記

堯都平陽舊矣唐顯慶三年始於郡城南建廟祀焉後宋元相繼或遭坤輿之變或值兵燹之虞廟廢而興者屢矣我朝正統丙寅山西左布政臨漳石公璞奉命重修迄今歷年滋久巡按侍御崑山周伯明公倫按臨河東偕孫魏二僉憲率

山西通志 卷二百七
府衛官僚恭詣展拜徘徊瞻顧之餘惜其殿宇門廡等處率多傾漏且以舜禹二祠配於堯殿之後殿之左爲老君祠右爲伯王祠祠之後爲玉皇閣皆肖像其中乃謀諸二公曰堯舜禹天下之大聖也以天位親相授受天下之大事也况舜都蒲坂禹都安邑皆平陽支郡今置二聖於殿後不得專尊於禮弗稱彼老君伯王皆祀典所不載於禮不經誠有未宜而玉皇卽上帝也惟天子得以祀之今置老君祠後竇莫甚焉悉命撤而正之更老君祠爲舜廟伯王祠爲禹廟閣則三聖並祀其上仍榜堯殿曰放勳舜曰重華禹曰文命閣曰執中名分秩然禮法詳備使吾人於千百載之下謳歌擊壤得以遐想陶唐虞夏之氣象如親見之者豈不休哉是役也太守郭君二守李君通府柴君韓君推府東君實綱維其事廟

成復於三殿之前各樹門扁堯曰俊德曰協和舜曰元德禹曰祇德殿之周圍鼎建新屋五十二間廊房六十八間翻瓦通計四百五十間增蓋齋宿并盛奠房各一所共十八間至於碑亭神厨階陛垣墉等處敝者葺之缺者補之卑者崇之隘者辟之由是易朽爲堅撤舊爲新凡衣冠縉紳之士得於瞻仰之際者孰不起敬起畏乎蓋經始於癸酉之冬落成於甲戌之春功甫告完太守郭君偕諸同寅請余爲記時予以司農謝事家居固堯民也敢書之以揚我公追崇三聖之意

七烈士廟記

李濂

余讀遷史至程嬰公孫杵臼之事及左氏所紀提彌明鉏麇之死靈輒之亡與韓獻子啓景公言立孤之言未嘗不掩卷而悲引袂雪涕而泣下不已也乃嘉靖癸未秋余巡郡邑至

忻州之九原夫九原者晉卿大夫之葬域趙宣孟之田邑也
世家謂趙孤復立得其田邑如故檀弓國語並載趙文子與
叔向觀乎九原蓋卽此地云余駐馬遲徊詢程嬰杵臼韓獻
子諸墓父老曰吾郡程侯山乃嬰之故村韓家溝乃獻子里
宅遂家莊乃公孫之中社原頭左城公孫之東西社也三子
者之墓俱在焉余因命父老導謁之出城南郭門則醑嬰墓
反而出城北則醑杵臼墓又東南馳二十里則醑獻子墓俯
而旋宵而承喟緬惟諸烈士年代遼逖塋荒棄非建祠以
合祀不可乃進郡大夫而諭之曰諸烈士風槩在天壤間霆
轟星耀振動千古矧茲故都也汝亟擇地而廟祀之翌日郡
大夫報曰城西北一里有龍王廟焉撤淫祀正不亦可乎余
往相之見斷碣伏莽篆刻莫辨洗穢徐覽始知是爲杵臼故

祠乃白其事於巡撫都御史長垣胡公巡按監察御史萊陽
王公咸是之王公復下檄督成且謂余曰匪祀何以表烈匪
碑何以昭遠盍紀其事而載之碑按宣子晉之賢大夫也下
宮之變屠氏之無道極矣程嬰朔之友也杵臼朔之客也獻
子宣孟所薦士也杵臼死之嬰立之厥贊之卒滅屠而反其
田邑可不謂難矣哉當宣子之驟諫也靈公患之鉏麇者受
命於公而賊宣孟者也提彌明軍右也靈輒翳桑之饑人也
觸槐搏燹接踵死焉倒戟報食不告亡焉皆感宣孟之義而
奮不顧身不可不謂之難也宜合祀之於是貌宣子於中而
厥嬰杵臼彌明麇輒咸配食是故合祀之者禮也先宣子者
主也次獻子者貴也次嬰杵者功也次彌明麇輒推及其烈
也春秋饗之者思也廟曰烈士者悼也廟旣成余作迎送神

二章教忻之人於饗祀之日娑娑歌舞以樂神而并刻之石
嘉靖二年月日

王屋山記

王屋山在濟源縣西百里禹貢曰底柱析城至於王屋是也
以其山形如王者車蓋故名或曰山伏如屋也又曰山空其
中列仙宅之其內廣濶如王者之宮也按龜山曰玉上經暨
茅君內傳皆云大天之內有元中洞三十六第一曰王屋之
洞周圍萬里名清虛小有之天杜甫詩憶昔北尋小有洞卽
此山也其絕頂曰天壇常有雲氣覆之輪菌紛郁雷雨在下
飛鳥視其背相傳自古仙靈朝會之所世人謂之西頂蓋以
武當爲南頂泰山爲東頂而並稱三頂云余夙慕天壇王屋
之勝顧塵事羈縛恒以未獲一游爲憾歲乙巳三月十三日

乙亥早起渡河往游是夕宿原武翌日丙子宿武陟丁丑宿
覃懷戊寅宿濟源己卯晨出縣城西走溝中四十里飯胡嶺
又折西南行十五里度秦嶺皆行山上逾五里至劍河堡南
行又折西北行十五里至陽臺宮在王屋山之麓唐司馬承
禎修真之所也明皇御書寥陽殿三巨字殿中塑昊天上帝
像旁侍十二宮辰皆偉麗而白雲道院乃在寥陽殿之東曰
白雲者承禎別號也入道院見大鑊一徑丈深數尺勝國時
物也宮之南有八仙嶺其勢如八仙飭冠佩下天拱揖而嚮
陽臺又有仙猫洞不老泉皆去宮不遠出陽臺宮東北行下
山百餘武謁烟蘿子祠祠前有洗參井祠卽烟蘿子宅址也
烟蘿子者晉天福間人世傳烟蘿子佃陽臺宮田苦積功行
忽一日於山中得異參闔家食之拔宅上昇云過祠北行礪

道中蹇亂藤履危石東西兩山壁立千仞風颼颼起巖谷林木間令人震恐礮道中行里許復上山坂壘巘盤曲莫記層數乃循石蹬道士導引入紫薇宮仰視臺殿如在天上至門金書榜曰王屋山朝真門門內爲天王殿榜曰天下第一洞天又上一層曰三清殿而對華蓋山如几案然又上一層曰通明殿設昊天上帝像殿中環列朱龕貯國朝御賜道藏經若干函有碑數十通皆宋金元時物薄暮酌方丈之松菊堂翌日庚辰夙興爲天壇絕頂之游乃乘小山轎僕夫持繩牽輿以上出紫薇宮西上二里至望仙坡閱披雲子修煉之跡又上四里至憩息亭凡登絕頂者至此必茗飲少憩故名其地有仰天池四面高而中凹舊有泉今涸至此則山徑愈峻險轆不可行乃步以上過此則躡瘦龍嶺登一天門曰瘦龍

者以山脊之癯如瘦龍露骨也過一天門登十八盤山石壁陡絕旋繞而上至躡雲嶠觀烟蘿子登仙石石上有足跡下有澗曰避秦溝又稍上則紫金巖巖之右有三官洞洞前有仙人橋少頃至南天門則愈陡絕手攀鐵索以上觀軒轅黃帝御愛松小憩換衣亭謁玉皇殿殿之東曰清風臺西曰明月臺皆巨石也又行數十步至絕頂入虛皇觀謁軒轅廟真君祠乃陟三級瑤臺極其遐覽東曰日精峰日始出時精彩爛然西曰月華峰月上時光華先見也於是東望海岱西眺崑邱北顧析城南俯黃河如線如嵩山少室隔河對峙咸聚目前下視華蓋諸山卑如培塿竊意天下奇觀無踰此者余徘徊久之乃下三級瑤臺遍觀今古諸石刻而日已晡矣是日宿上方院偶思李白詩願隨夫子天壇上閒與仙人掃落

花之句超然有遺世獨立之心焉余入寢室將就枕道士走報請觀天燈亟出視之則見遠火如流星下上明滅杳無定跡時從行者咸相顧駭異辛巳昧爽起觀日始出之景甚竒天旣明陰雲蔽翳移時頃之開霽步至北天門見古松十數株夭矯如虬龍環列成行儼如侍衛皆千百年物也遂觀捨身崖志心石在東北虛巖之上突出一石濶尺許長丈餘勢欲飛墜下瞰峭壑神悸股栗又觀老子煉丹池池上有老子祠古碑存焉聞東北有王母洞奧邃莫測人跡罕至元歲時投金龍玉簡於此余欲往游之道士曰徑險不可行且有蛇虎潛其中乃下南天門一里許遊黑龍洞洞前有太乙泉一曰太乙池蓋濟水發源處也世傳析城之山升白氣於天落五斗峰化爲濕雲自竇中滴水降太乙池云道士曰每歲諸

元會日五更之初輒聞仙鐘自遠洞中發聲悠揚清婉可聽又曰日出沒時常有倒景之異余暫遊速返悉未之逢也是日由舊途下山仍宿紫微宮曩余嘗夢遊一山極竒峭嗣後遊四方名山無似者乃今登覽王屋種種與夢中所見合夫豈偶然者哉

河東書院夫子像記

呂 柟

河東書院前御史張公仲修所建而夫子遺像石刻乃立於退食堂後四教亭下適當人往來必由之地至其下者每不能常恭蓋禮主於恭恭數則慢生心主於敬敬數則褻起今巡按初公流觀其中見九峰山北峙而書樓巋然在前曰是非安祀夫子所耶乃命移像於九峰山之南麓旣定起殿三楹四壁內壁塗外皆甃甃丹牖朱戶煥然山前南望書樓若

夫子身所指顧以示後學者也公至河東之年嘗選學中俊士四十餘人肄業書院比秋已舉三人今年又選少且敏者十餘人亦肄業且謂之曰爾諸生知遵夫子之道乎夫進學以修德爲先素行一虧其餘不足觀已所學亦奚以爲諸生若外矯飾而內姦回口詩書而心市井或騁血氣而凌師長或挾仇忿而擠朋儕或家居而倫理弗惇或外游而行檢不飭是皆得罪於夫子者也雖日置夫子於當路何辭於褻慢哉茲殿之成蓋不獨尊安夫子之像亦以使爾諸士知所以敬夫子者在實不在文在信不在貌也

河東書院記

正德甲戌春御史張子仲修巡鹽河東官吏革譽商民胥悅夜讀書晝誨諸河東生廼從官師之請作河東書院於路於

是諸車人店人牙人願獻木石暨力諸工師願獻能諸園藪願獻厥植廼選義士命理廼築堵周七十雉廼作先門三櫺南面北渡石杠儀門三櫺又北講經堂五櫺阿棚前南面層階雙桐夾階桐外有二松夾陳皆松柏若槐東爲崇義齋五櫺西面西爲遠利齋五櫺東面碑亭二在二齋南南面齋負序序交儀門之南墉儀門東東號門南面東號門而北東上號門東中號門東下號門皆西面北上東序在其前三號皆南面三櫺自門折道以登其堂皆夾樹下楸中槐上桐背二梨其夾階也皆茨栢號皆有厨二櫺在左西面儀門西西號門南面西號門而北其制如東號門而北表二門皆雙楸退思堂在講經堂北五櫺南面二槐夾階茨栢在其南四教亭在堂北亦南面堂東偏南下爲左曲房西面其後胥人房西

偏南下爲右曲房東面其後隸人房西墉之西蜂房四區東面東墉之東蜂房亦四區西面四教亭北築閣構樓曰書林上祀三晉名賢側藏籍其林帶水爲環池如圓璧以種蓮泛舟曰天光雲影又北爲亂石灘灘北爲山九峰中峰曰仰止亭東曰杏壇西曰桃源旁皆甃井曰源頭四洞先後山曰游仙蓮池在山後麓巘岫巒巖皆有茂木綰霧縈雲故左曰豹變右曰鳳鳴自環池東爲石榴園亭曰日心西爲蒲萄園亭曰月種皆背松棚鞠籬見山在山北西面亭曰悠然其後牡丹園亭曰麗景又其後紉蘭園亭曰余珮皆西面亭皆南面竹逕通幽在山北東面亭曰綠猗其後荼蘼園亭曰微風又其後藉草園亭曰一般皆東面亭皆南面自仰止山後歷青陽而北爲游息亭又北爲百果園其山北東麓甃井槐亭西

麓亦甃井槐亭翻車上水潛山翼流南過源頭井又南會於亂石灘又南滙爲環池環池東南開流過東蜂房南滙東號厨至東號門至南東滙爲方塘西會西流於石杠其西南開流過西蜂房南滙西號厨至西號門之南西滙爲方塘東會東流於石杠又北流分灌山後諸園至於百果故君子入先門則懷德瞻儀門則正履視碑以懼後居齋以齋心陟崇義思入神降遠利思室欲升講經堂思考業處退思以防過守四教以存誠仰山以樂仁覽水以樂智覩蜂房以思義仁且智與義矣斯周德日心忠也月種順也忠順不失斯見歲寒不凋之節故松棚在其後松棚者與松爲朋也是故歷亂石可以知險登書林樓可以知危游杏壇以述古訪桃源以濟世憩悠然以正出處閱麗景以觀造化撫綠漪以成圭璧賞

山西通志 卷二百一
微風而識乾坤是故余珮如蘭斯馨藉草靡他其適若是乎
可以游息矣故游息亭終焉譬諸草木旣爾斯果矣故百果
園又終焉

龍門山記

龍門在秦晉之間萬山之會禹治水極力之地形勢甲宇內
久懷遊覽而未獲內濱子曰天下之美不努力一至卽情違
不可補况此禹跡所在乎他日谷泉子西巡亦猶是興也乃
四月之初實齋王子仙自安邑至明日河津谷泉子自萬泉
至又明日柁自解州猗氏至又內濱子自運城至是日雨甚
諸公曰如來日霽天貺佳期矣來日果霽於是道過辛封謁
卜子夏祠召其世嫡遣就運學教授而改其名紹云北至清
澗風大作從者曰俗傳食豕肉詣禹廟必風予未諾然以懾

寒入福聖寺加衣風滋甚衝風往神前村至山麓乃緣棧道
步屨而升旣謁禹像風益焚輪起撼松栢騰沙礫上蔀天日
下掩河汾若蛟鳴虎嘯若禹役使羣怪持雷斧秉神斤以闢
龍門時也然實齋席設無豕肉旣升殿從者置攜尊神几內
濱子曰禹惡旨酒可避之谷泉子笑曰禹所惡者旨酒也此
酒恐不足以當禹惡酒行移時食且舉風息食有饅頭飭其
餽者豕又不風不知俗傳者何也土人曰此地日有潮風蓋
大河流兩山中嵐氣薄觸空洞卽颺颺無所於散此或其真
云食旣遊觀四壁金碧丹青十三彫榭蓋自六藉子史言禹
事者無不開方絢織且筆精意遠非時工可到殿記在元貞
年間璧圖必當其時關中人稱岐山周公廟畫殆不過是也
旣乃北謁後寢見塗山氏像止二嬪侍側而冠裳樸質猶可

想見古風出廟西南乃捫蘿緣磴以上望河樓卽谷泉子所改吞吐雲雷樓也樓在龍門左闌之上蓋梁山中斷而東峙者也其前懸臨中流上作石室旋柱其外以爲轉廊室塑十閻羅像俗言至此絕險與死爲鄰也樓外俯黃流凌白雲孤山直對而雷首中條渺渺冥冥乍見乍沒皆入望眸踈蹙而下會二公至流丹亭亭北倚石崖其南半懸中流栢柱斜度其下上有板棚鑿板如井口以汲流卽勺水於滄海也亭扁則白巖喬公小篆下亭就實齋子於河壩壩西者河其東皆怪石層崖翠嶺崎嶇不可以步而內濱子飄裔如飛予力追不及至壩則西山東轉北遮河流不見來處佇灘環望四面皆山中如院落其前則兩山拱峙自窟穴而出故曰龍門云爰有煤舟南自蒲津絡繹而來棹歌漁唱不殫圖此其爲禹

穴乎或曰龍門之外河洲之上青草萋萋黃沙坐視河之高不過咫尺若遇秋水泛溢雖百里之漲千尋之濤不能侵一抔焉是則禹墳者也內濱子曰禹古今之大智而乃葬身於此乎谷泉子曰會稽亦有禹穴云其在河之壩也方欲卽舟北行以求所謂懸流三級浪者或曰在金門五七十里或曰在吉州百餘里然不能往徘徊悵望攬僕南返蓋天下奇觀亦不欲人盡覩而風雨幻忽雲雷時出亦此山之神粧點修飭聳來者之觀乎然斯遊也不可謂不索其隱而探其奇矣

王官谷記

王官谷者司空表聖隱居之地今少叅許君德徵重修而增飭之涇野子至解借邱孟學往遊焉馬至故市西折而南谷水北流入市問卽貽溪也沿溪南行五里至谷口路多巉巖

石礙馬丹柿赤棘夾路掛裳衣躑躅至先門伏馬而過道流引登高至門門下砌石百級夾扶之而後能上道流建閣以祀玉皇乃升閣參拜下閣北至三詔亭又北過休休亭謁表聖日已暮南過了了亭有侯段兩生讀書白雲洞洞則元孤雲子李了了菴所居以學休休者也乃南臨石泉橋望天柱峰則見羣山環拱而此峰孤高插天與故市街所望蓋不同蓋其峰南之崇山又遠也渡橋夜與孟學連榻石泉洞中洞在天柱峰根其前有清流自東瀑布泉引來而西滙爲小池欄護焉晨興瞻望表聖像飄然有出塵態讀休休記乃知其抱經濟材與時不合而隱甚可痛惜但未題耐辱居士則柝又病其隘也壁間多宋元人詩道流引登西山觀秦王硯硯大如碾盤無口下如尖底磴表聖山中記已有此名其秦敗

晉師於王官時所遺者乎自硯旁不由故徑懸下蒼崖觀雙人石石在天柱峰西北倚峰而立上有圓石二枚恍若人面狀又似北望秦硯而欲濡毫者也道流又欲西觀蒼雲洞北至蘆葦泉言洞常出雲而泉更甘冽云爲曹仙姑地未往直趨掛鶴臺瀑布自天柱直下而臺在其左旁鶴二月來五月生子去有懸草眠迹焉臺東與孟學四人各據一石而坐北瞰天柱益突兀有四瞻雲日俱無影止有一峰高接天之句欲東升以觀東瀑布道流難之又欲南進以睇黃河道流又難之乃歎曰天下奇觀豈可盡哉遂北反坐聚仙堂東遊豬耳山又東南至瀑布登懸崖以觀之聲如雷轟貌如雪舞瞻瞰更久乃下崖傍流而行北至柿林臨流遍坐磯上孟學坐一孤嶼僧登樹頭摘柿落紅滿地吟興俱發各得幾詩僕自

故市沽酒至道流菹以鮮蕨秋英乃滌巵澗中而傳酌蓋不
美古流觴也遂北至張御史所構觀泉亭則東西瀑布合流
之地卽表聖之濯纓亭也問修史覽照瑩心九籥擬綸諸亭
及一鳴窓道流皆曰亡之矣乃謂孟學曰柟嘗薄唐詩人若
表聖者豈可以詩人目哉遂歸息聚仙堂又明日道流以予
不至仙姑洞也昧爽取蘆葦泉中水煮豆粥佐以藪以餒予
畢乃白石泉洞南登路如蚯蚓檜栢交錯難進乃以手拊道
流背一皂以一繩引道流手面後上至秦無隅壩前北望不
見娥眉坡是以微陰蓋予已出雲霧之上矣盤曲再登至李
孤雲壙乃歎曰世之廉夫清士不用於時避世而至此耶則
豈非執政者之失哉又東繞而上至八仙洞已到天柱峰腰
洞口俯瞰謂孟學曰彼李孤雲者風斯下矣出洞又欲直上

天柱之頂道流皆謂路不可行然予益努力勇往幾至其巔
俯瞰八仙洞又渺乎其下又歎曰不知唐時表聖之足履德
徵之攀緣曾至此否乎

修平水泉官河記

平水上官河泉出府西南三十里平山之下平山者莊周所
謂藐姑射山也平水之源爲金龍池池上爲龍祠祠西南近
條山數泉皆入平水又東二百步爲平水神祠祠前爲清音
亭東過清音亭之後爲雲津橋而平水分流俗所謂十二官
河以溉臨汾襄陵之田者也蓋自是第一流爲上官河以至
劉村夾河三十六村爲田二萬餘畝皆資焉然自張家橋東
過石曹澗至於趙半溝其南支流爲上中河而居民新開飲
水之處則在其北焉又其東爲席坊橋其北則受小石橋之

平水席坊澗之山水水多泥淤砂礫上官河遂不復東行而南入上中河矣於是席坊祿穿麻冊南小榆諸村皆受其利而麻冊洞以東二十餘里無復勺水之潤矣於是上官上中民交訟焉太守王公曰上中河者私也上官河者公也上官河博而遠上中河狹而近不法不德則守不堅法則民畏而訟平德則民化而訟息寃厥病本其在席坊橋乎有張滋者善行水遂使滋決席坊之壅濬平水上官河之源於是上官河滔滔東注直抵劉村鎮以復其舊而界玉下院東宜補子塔頭段澤馬務南劉辛息諸村皆成陸海不圩而稻粳茂不雨而麻麥熟蓋雖江南湖濱不足以方其美也而上中河之民亦分程限日均沾其澤或有尊賓嘉客道出平陽太守則邀謁平水神祠坐清音亭上矚官河之源流賦詩飲酒與民

同樂歌曰官水漾漾兮百穀成水無私心兮民不爭判官呂柟曰王官谷瀑布泉下流爲貽溪水可灌田千餘畝唐司空表聖立法谷人以時用之至今不廢異時太守李公義方亦作永利池利澤渠而趙城洪洞臨汾亦甚賴焉太守常云政在善俗俗先禮讓禮讓之興在閭里田桑鷄豚之間夫虞芮亦平陽屬邑昔人訟田不決如周以平皆慚而還置閒田焉今猶有遺風也於乎人孰無是心安知他日兩河之民不爲貽溪永利諸渠乎於乎上官河其永矣嘉靖四年三月二十二日工興四月四日成太守字公濟名溱開州人辛未進士前監察御史

重修溫公祠記

夫夏迺宋司馬溫國文正公故里也墓在城西鳴條崗高堦

里高宗南渡子孫盡室遷浙之山陰蜀之叙州矣元大德間張式始祠公於夏學之左延祐間李榮祖作塑像歲時有司致祭然規制隘陋歲久屋敝至使先生像貌皆被雨淋漓巡鹽潛江初公按部至夏憤然興懷見所居察院深邃而松栢茂密慕公之極則曰是非棲神所耶卽欲移祠先生焉及與巡按馬公清戎儲公會議遂改祠於縣治東北其基南北二十有六丈東西十丈正廳五楹前東西廡各三楹廳之後正寢五楹其東西箱各三楹廳之南中爲二門三楹左右爲角門各一楹又南建坊以爲大門而周垣高廣視舊祠殆十倍焉其費皆初公發縣贖罪金二百餘兩他無所取蓋恐厲民非先生所安耳外又考得官地水田九十畝則以實簿正祭祀將候他日司馬氏後至而歸之也且落成公謂柝宜有記

而夏縣單君文虎實受委理又懇問焉於戲先生之道感天人存誠一者蘇子嘗言之其致用之德庶幾乎仁明武者余嘗言之昔者神宗謂左丞蒲宗孟曰如光未論別事只辭樞密一節朕自卽位以來惟此一人斯則天子慕之矣先生自洛赴闕庭衛士見之皆以手加額曰此司馬相公也民遮道呼曰公無歸洛留相天子活百姓所在數千人聚觀之斯則國人慕之矣海內傳誦以爲真宰相雖田夫野老皆號司馬相公婦人孺子亦知其爲君實斯爲天下慕之矣遼夏遣使入朝與吾使至虜中者必問先生起居及爲相遼人救其邊吏曰中國相司馬矣慎毋生事開邊隙斯則夷蠻戎狄慕之矣豈非其所謂誠一仁明之著耶而况於至其邑里者哉夫龍鳳之爲物人固知敬且慕平居則或談笑而道之及臨其

淵撫其巢龍鳳雖往而傾羨注歎之情視平居尤甚也夫夏其司馬氏之淵巢乎至其祠有不動六陽九苞之懷者哉且初公至晉卽委柙校刊先生之傳家集矣斯舉也又非止臨淵巢而歎龍鳳者也里之英傑俊髦宜知所向往而不可後矣馬公名錄字君卿信陽人正德戊辰進士儲公名良材字邦掄襄陽人丁丑進士公則諱杲字啓昭嘉靖辛巳進士蓋以巡鹽數至先生之邑里者也

絳州重立古法帖第一記

易繫辭傳曰古者結繩而治後世聖人易之以書契百官以治萬民以察於戲文字之興其在斯乎後世乃有迂儒鄙士不知出此留心於末雖以王羲之之賢敗筆如塚洗墨成池亦用力於點畫鈎撇之間至使唐太宗英主也以蘭亭記殉

葬安在其能治官察民乎予嘗盤遊於涇渭漆淇洲渚之間打起鷗鷺蟲鵲見沙上爪痕羽印皆類古文其絳州所傳蒼頡書乎或如風行水上或如雲出山前或遠取諸物或近取諸身真天縱自然之妙昔侯芭學竒字於楊雄恐未升其堂也世傳夏王大禹作龜書謂禹治水元龜兆相沙門懷英乃至作龜鼈之形此何以爲也今見絳州禹文亦類鳥跡少降而就真沙門體誤必矣漢魯共王得尚書于孔壁皆蝌蚪文近世遂作蝦蟆狀今觀夫子所書吳季札石於禹無間然矣將所謂蝌蚪者以漢文形之而名邪至若史籀周宣王之太史氏也又在夫子之前而岐周石鼓之文多類此書後人以其不似鳥跡乃取諸鐘鼎文爲古文以附鳥跡而凡史籀字又另作籀文以傳如元楊桓六書統之說今觀此籀文與禹

孔亦不甚相遠此又何以辨也大抵古人寡言重行皆簡質後世一義數語不能盡一事數紙不能畢故率棄本而務末於治官察民難矣絳州守延安程君騰漢於州治左壁間得頡禹孔籀四書乃真古法帖刻而未移晉府者至是表而請記豈徒爲文字傳哉

重建行水碑記

李太守者京衛籍浙江景寧人舉進士諱琮字義方舊平陽知府也行水者成化末年修利澤渠及永利池也利澤渠者長沙李學士先生東陽有記曰元中統間有引汾水者由趙城衛店堰而東流合霍澗二水爲渠以溉趙城洪洞臨汾三縣田四萬畝至順元年晉寧路達魯魯赤朶兒只因地震渠壞又浚汧口五十二小夾口十有九桔槔護夫皆具以教農

興事國朝歲久池湮水壅成化甲辰大旱太守請於當路重浚此渠引汾水於洪洞西北築壩以截其流復取霍澗之合流於羊獬壩鑿池四區窪而級之以爲甃槽淳洩斯水又於高河築壩二丈濘十有四節啓閉以時灌溉沃饒引其餘水入流城中資萬室飲傍水地價頃至十倍矣永利池者錢塘倪宗伯岳有記曰平陽郡城水脈鱗鹵不可民用宋慶曆初知州潘大博引東山臥龍崗黃蘆泉水入城爲池植蓮其中金源氏亂水塞池廢國初郡守徐仲聲鐸北引汾河深利渠水穴城注池以供衆汲中爲土梁界池爲二甃以甃甃四方各長二百有二十步其深七尋植檻於梁上使人往來名永利渠歲久衝涸兼豪右侵據民罔攸賴成化乙巳太守委官募役重加濬治旁池鑿井朝夕利汲而銀買車運之苦遽革

又慮池瀦停濁鑿通池前郡學及不由兒濠環為芹泮城外之水皆可引入城中無滯又於羊獬之間輦石為梁洞殺上流勢用去霖雨泛汾沒溺民田之患明年秋請諸當路躬為引水洞長千有百尺過水洞長亦半之井橋既具花木茂植仍作書院於池側以居俊秀其利始永矣柘昔過洪洞汾趙之間見溝洫縱橫禾麥肥美以為江南湖東亦不過是詢諸田父皆曰李太守公之澤也今見李倪二記不信然哉太守曾公解梁鹽利主開西場門運人餽千金而不受有垣曲賊數千為亂猖獗太守單騎招撫之賊感其恩信解甲設榻寨中具牛酒享太守而降事聞上賞太守金帛甚厚而垣曲父老以石刻太守相構祠以祀之此皆為人所難為者使太守而在兩漢也龔遂杜詩當遜居下風矣太守自平陽遷湖廣

叅政山西按察使福建左方伯所至有政績云

潞安府記

唐龍

潞安府者改潞州而為府也民用乂焉境用戢焉巡按御史姜子潤身行郡至於斯曰潞其治矣紀治以文而不可以已也乃以屬諸不敏惟潞古上黨郡也距百餘里則青羊山拔而峙焉中多沃土蔚林農稼樵芻托之而處但强悍亦每竊伏憑恃險阻叢慝犯禁聚則攘臂以剽鄉村散則影匿罔受捕逮嘉靖戊子守臣陳其罪狀加之以兵多所失至合三路之師然後底平之績奏焉皇上以德化民事務安輯於是命兵科都給事中今陞大宗伯夏公言勘處其事公祇奉德意其至也取各功若罪而甄別之矣尤是咨是度曰潞地勝可府青羊人野可縣府與縣相維而糾以兵備重臣斯盜賊解

山西通志 卷二百一
其姦而無或後虞也遂疏以請詔稱可錫府名以潞安內附以長治縣青羊置縣曰平順兵備涖府若縣以按察司副使領其職是皆安之而已夫非平盜之難而無以安之之爲患潞之盜擊平之矣而青羊阻自若也玉峽虹梯猶蠹蠹也然崑險結則獮戾生洞穴盤則逃亾集兵散斯玩玩斯萌萌斯滋滋斯擾而其憂豈遂已邪於是控之以府以厚專城之托厥秩重矣臨之以縣以廣親民之任厥勢近矣秩重則易馭勢近則易結而又有專道之使修軍防焉明法軌焉布戒令焉狗鼠之徒其姦自無所蔽而或有觸法者禁則止縛則至麾則散折箠制之而有餘矣而又何盜之憂昔漢渤海歲多盜乃選二千石以治之刀劍頓息而教化行是故今日急急於郡邑而增設之也而被是選者果能奉職循理不驅民於

饑寒而惟務厚其本業以足其衣食則人知榮辱雖賞之使竊赧然而不從焉此則安之之本也惟良有司盍慎求之

書樓記

馬理

河東書院者張子侍御之所建也侍御巡河東鹺省無益作有益故有茲建也由門而入歷齋而堂而寢而亭備矣由亭而入有重屋焉巍然而臨乎臺池者藏書樓也張子曰夫書隆也藏焉爾矣夫寧無不善誦習者乎以舉業者尚乎利以文辭者尚乎名以訓詁者尚乎緯以索隱者尚乎誕故尚利斯不足與言義矣尚名斯不足與言實矣尚緯斯不足與言經矣尚誕斯不足與言恒矣亦寧無廢書者乎曰率性之道吾固有之也在行之而已夫焉用書是誕之說也佞之徒也故仁斯愚義斯慘禮斯窒智斯蕩信斯賊直斯絞剛斯狂勇

斯亂不可與入道焉予爲是懼故樂人之善學而藏書焉藏欲富惡濕與蠹故用樓也藏以序故先諸經而後及其他也藏欲久故擇人以典之貯諸匱而扁且鑰也誕之害人久矣故藏之富者欲博以文也蓋惡徑約者也務博者鮮知要焉故藏先諸經示以要也而司教者使利者義之名者實之緯者經之於道也其庶矣乎谿田理聞而善之曰於戲侍御與人爲善如是哉可志也夫遂志之侍御者安陽張仲修也

運城鄉學養蒙精舍記

古峰余子巡鹽河東三月乃觀民而歎曰惟茲唐虞遺民乃或弗淳厥責在予其何尤乃圖教其父兄以及子弟爰遵制建學於鄉學成爰入學崇訓修約講學行禮觀德養老訓諸蒙士凡入學修約立約正約副約贊三執事人惟民之父兄

惟俊夫訓者乃皇祖之訓所謂教民文者是也凡月朔望三俊率諸義民入學乃讀教文俾衆諦聽以戒以勸是謂崇訓夫約者呂氏鄉約古峰就加潤澤者也嘗揭以示衆俾日率由至是考詳省慝是謂修約於是言言於是語語於是詰難率以言法行是明是謂講學於是陟降周旋循矩蹈矧是謂行禮於是張侯設物主賓就位衆耦有叙揖讓和容興舞以射是謂觀德於是序坐以齒揚觶飲酒肄歌風雅以侑以燕諸慝不興是謂養老是謂父兄之教也學有規制先古峰記載詳矣由學而入而東則養蒙精舍在焉中有游息亭者卽觀德所也亭後有堂六楹曰養正擇師居之所以教也左右四齋曰孝弟曰謹信曰恭敬曰藝文各六楹弟子居之所以學也是謂養蒙是弟子之教也凡朔望施教古峰子泣焉凡

淑慝必聞行有小大勞亦如之其大者卽如制表閭免役以榮以耀俾衆望以歸厥不在時諸真頑匪人行有小大罰亦如之其大者則屢校荷校滅趾滅耳以戮以徇俾衆威以遠是故罟阱設而安宅麗焉夫父兄斯知歸矣弟子焉往是故河東民故健訟今日相觀而善恥訟改行夫誰之力也初古峰泣衆和易小人竊議不威君子退而歎曰御史以德禮教我弗率且移屏弗齒是殆甚於不可仰視者矣卒孚威如君子言夫古峰尊師取善非自用也夫鄉約雄山仇氏嘗行之涇野呂子仲木爲解州判日嘗爲仇氏訂正行於解城解俗至今美焉古峰乃又教學於斯安邑人太學生王世相者仲木之徒也古峰嘗選爲約贊呈十善卽榜而行之其尊聞行知又舍己從人如此非尊師取善而何古峰其真不自用矣

夫夫古今高明之患在自用其甚者則妬賢而嫉能乃古峰獨異撰他日休休之度其可量乎於戲古峰攸行可以爲君子法矣後之君子於古峰有取焉以光厥休吾知堯舜之民會可復見又不啻古峰子也盍監哉

義士王海表閭記

韋令之治陽城也谿田馬氏問曰令得人焉爾乎曰有王海者義士也其爲人事親孝恭而儉積而能散好義而聞於上獲表厥里焉夫亦匪夷所及矣夫曰其詳何如曰父在不敢自專事母聞義稟命而行喪葬不以貨財不作佛事哀毀而已然三年不入其室非孝而何有攸往目不邪視舉足安重衣不重帛食不重肉積其財將有爲也非恭儉而何其積也水旱人饑則賑之歲終親舊不給則賑之貧不能婚者婚之

病不能醫者醫之死不能棺及葬者棺之葬之爰立義塚焉
士學而無資者資之鄉鄰子弟宜學而未能者爲延師教之
爰立義學焉避兵而來依者一士一民皆養之思歸而不能
歸者歸之有稱貸而不能償者則焚其券河隄之決也則出
財補之非能散而何盜之起也有柳莊屯賊劫庫而殺人則
會兵平之有王德周兄弟聚嘯而劫掠則會衆擒之張士兒
之亂也則佐以糧芻及壯士勦之湯家集屯賊之亂也則從
薛御史鳳鳴兵討之大盜劉六劉七之反逆也白諸官請給
帖文行事察鎮無儲者散麥五百餘石豆二百餘石仍出資
率人築城鑿池建門及樓造諸兵器火器禦賊賊至東破蕭
縣南破永城西破夏縣北破碭山乃攻海所居鎮海守且戰
戰攻不利且索財講和不許賊退俘獲馬騾三百一毛不取

白巡撫鄧公璋給義勇士焉鄧償功給銀二十兩受之送夏
邑縣修學時總治彭公澤劄付海會淮安朱指揮兵歸德萬
指揮兵截殺流賊二兵不至海捷後白彭叅二將咸抵罪焉
彭兵五千過鎮餉以熟飯千桶兵食之不盡徐州將陳經領
兵至鎮不理兵事唯徵錢償妓夜飲海曰此亦賊也令義勇
夜執而晨縱之陳愧而遁王堂反何都御史天衢征勦令家
人從征餉白金百兩事平奏聞蒙勅賜表閭曰好義坊夫是
之謂義士然聖天子旣表其僑居所矣陽城其本邑也令乃
不能奉行德意昭其行以勸善安在其爲令也茲欲豎石東
廓勒其行何如谿田馬氏曰昔布衣之士鄭有弦高魯有曹
劄春秋書之戰國有魯仲連漢有杜子春史漢書之論其功
肉食者未能先也今義士犒師則弦高之儔其禦寇而保衆

則曹劌與其倫使其遇變而當途用事安知其不與仲連子春同其烈也彰其義以勸善此誠令之政也令其行之哉令曰諾義士字大量陽城上佛里人弱冠從父爲賈韓家道口鎮韋令名文英字本和涇陽人嘉靖壬寅歲令陽城云

三立祠記

王道行

山西河汾書院舊有三賢祠祀文中子司馬溫公薛文清公學使者擇秀才高等者百數十人講讀其中萬曆間江陵柄國忌人議已以爲多白鹿洞學徒奏毀所在書院於是三賢祠遂廢神人失序禮義以愆典學之官往往不得其職河朔魏公秉中丞節至晉陽慨然以興學右文爲已任與先後巡察杞縣徐公邵陽劉公並稱名德有合志焉會諸生請復祠移學使者永春李公冠縣杜公勘詳皆以爲復之便公重用

民力咨於省使無錫萬公郡伯膚施趙公計版築書土庸圖規制程期日度可四百鍰而集萬公括堪動帑銀並已所節縮竒羨二百鍰考試支剩銀二百九十鍰不足魏公推幕府市租五十鍰劉公御史臺贖金十六鍰憲伯廣濟劉公叅知新安甯公膚施白公東萊宿公憲使肅寧易公岐周楊公贖金總三十鍰郡伯十四鍰凡六百鍰而羸晉王以五十金犒工鳩僝考成不愆于素餘以儲典籍利器用豐餼廩居三之一焉別駕滇南王君寔專工事爲堂五楹扃以棖闌繚以周垣前起棹楔望之巋如也祠後爲書院別有記作於某年月日迄於某年月日凡幾閱月而成遂空軒敞神人不相滄君子以爲禮於是右省齊河房公濟陽高公學使者黃梅汪公憲使安陽劉公相代至適觀厥成嘉與學士大夫更始請卜

日安主魏公曰政必正名禮先辨分考晉乘唐虞諸臣列名宦鄉賢祠中如稷契殷周始祖先師其子孫臣庶也可儼然據其上乎三晉名賢載在往牒何止三君子宜更議於是汪公考古徵書采風論德與諸公雜議得風后以下至伯夷叔齊十有七人位南向名宦自叔向以下至我朝呂文簡公十有八人西向鄉賢自董狐以下至薛文清公十有六人東向寓賢卜子夏田子方段干木別爲位居鄉賢上魏公以爲允題曰三立祠語不朽也每歲丁祭籩豆牢醴之數視啓聖祠學使者至之是役也爲大事不計小費萬公救厥功秩祀辨賢以爲世法汪公有焉兩省前後諸公同德一心翼宣文教盛矣至於率作興事則趙公衡於上綱舉而目張前令歷城陶君今令洛陽徐君贊於下費省而工勸愷悌君子神所勞

矣其諸君子之謂乎竣事而巡按海陵袁公至廣厲文學如魏公士益顛顛嚮風矣萬公偕諸公詣王子命曰書院羅材聚而教之一道術也先民是程生於斯宦於斯者祠若干人不可以無述夫書院袁公記之矣祠則吾子道尊者言信身習者事徵宜無辭焉道行謝不敏嘗讀春秋傳穆叔對范宣子曰太上立德其次立功其次立言是謂三不朽魏公有取焉故爲是祠而建祠以從陸文克舉誠希濶之遇哉昔孔子刪書斷自唐虞今乃上遡羲軒下逮近世何也取諸晉乘吾鄉之首善先猷也如風后治民倉頡治字先天而天弗違其古之神聖人乎虞廷五臣與夔龍交讓精一執中之學見而知之肇開道統祖述於仲尼集大成則聖具一體則賢或肱股王室如巫咸傳說狄仁傑韓琦諸人或經營四方如羊舌

山西通志 卷二百一
臆包拯若我朝之劉大夏于謙其人或仗節死義如關龍逢
張巡其人或修身謹學如卜子夏程伯淳若我朝之薛德溫
其人褒貶論述如晉之董狐漢之司馬遷其人是雖德有偏
全功有大小言有醇疵就其所至皆可謂能立事見本傳文
不具列祭法曰法施於民以勞定國以死勤事惟其所遇可
無媿焉今之人猶古之人也莫不攸好德莫不喜功莫不務
修詞而能立者鮮則志不篤也學不純也氣不克也義不精
也斯不可與立已故居常自許皆知慕仁義賤俗鄙堯行舜
趨自謂近之一涉紛華易至流逸而失其故吾此可以責志
希蹤古人奮然邁往一念少怠盡隳前功此可以知學抱曾
史之行履桀跖之庭能不攝不變可以占氣傳經義綜羣言
辨士縱橫圓如轉轂莊列要渺茫無涯涘皆能發其藪而折

其角可謂精義故曰考諸先王而不繆百世以俟聖人而不
惑豈非立德立功立言之準乎國家又安二百年曩蘖浸廣
士習些窳學術多岐今日之所養卽他日之所用可不慎乎
明道先生紹不傳之緒文公繼之至我朝文清公又繼之宛
然孔子家法頃歲誦習龐雜市間帖括殆同語怪後生方沉
湎濡首以取世資本之則無又焉能立吾不意堯舜以來之
道脈汨亂如此求爲賢相爲名臣爲大儒如祔位諸君子其
可得乎又如一旦有緩急如關龍逢張巡以身殉國將誰能
乎文學生於斯聚於斯能自得師爲則不遠其慎所立矣

還元洞記

鄭洛

北岳恒山故朔方雄鎮山故有洞洞蔽以神祠若將塞焉侍
御黃公觀風覽勝慨然興思乃撤而啓之題其額曰復還天

巧且爲之記其狀矣分巡鄧君持侍御公所作以請曰茲洞也固恒山奇觀洞開則茲山勝事也乃侍御公已題額言之矣曷可無佳名以記先生圖之予曰奚名哉粵稽元始生大道大道生天地天地生萬物恒山固天地所覆載山若洞亦萬物中之一物也予昔登山臨茲洞矣杳冥幽窅既不可窺測其端際亦不能想像其藏隱蓋天造非人力也彼金沙大隱美則美矣率以人與魚藻寒居奇則奇矣皆緣力飭夫人力則非天巧非天巧則非大道所生非大道則非元化所肇若恒岳則與天壤並立洞亦與恒岳俱生開以大始闢以貞元愚父不能力移齊諧莫詳自始蓋一元不能不散而爲萬象則茲洞也固一元之所造也今侍御公撤其蔽而新之亦復還其天巧焉耳然則茲洞也不可名無已則名以還元可

乎雖然予重有慨焉夫元象之元含光自然分而萬形散而萬物生生化化已非元元然而山澤氣通洞爲元造物理備我性有元善洞爲元造啓則還之性有元善乃自鑿之恣智巧縱物化致使真者散元者斲降衷靈光錮蔽焉而不能通殆不啻茲洞之障塞而已然則茲洞也其曷幸而得侍御公還其元造之巧又安得元化旁敷使並生於宇宙間者盡還其天命之元善哉若夫抱元還元自了性天元精之元其說甚元則固黃冠羽衣之所從事予不敏奉明天子命撫綏此方將以元化望當時以愛養元元勗同事之諸君子不敢襲其說以名茲洞因謾書以答分巡君之請

新建唐鄂國尉遲廟記

蒙 詔

自昔豪傑之生鍾天地剛大磅礴之氣豈特揚曜吐精樹勳

山西通志 卷一百一十七
業於當時已哉雖其歿也而是氣流通於天地間與日星並明與陰陽並運不恃生而存不隨死而亡每有感觸輒形諸夢兆若桴鼓影嚮然嗚呼烈哉子昔閱唐書嘗壯尉遲恭之爲人歎其真豪傑士非特將略之雄也每讀其傳斂襟起敬久之而公則朔產也嘉靖丙寅歲予奉命按治宣雲夏四月巡歷至馬邑一夕夢金甲神英姿還侍直立馬上馬蹀躞若龍金戈翠旗導從前後謁予若有所訴者予覺大驚異其事翼日出至龍泉寺見唐鄂國公遺像在焉叩其所自邑尹吳子進曰鄂公舊有祠去此僅二里許燕於燹火有年矣棟宇灰燼惟神與馬巍然獨存居民不狎於棲神之無所權奉於此以存尸祝遂卽其遺址觀焉草莽邱墟睠言懷感予曰異哉向夕予夢金甲之神非與祠前有金龍池卽桑乾河源也

清漣澄澈嚴冬不凝邑尹復進曰舊傳池有龍時化爲馬一驪一黃人莫敢御唯鄂國驍勇絕倫能跨而制之予又曰異哉予向夢金甲之龍駒非與夫鄂國輔唐昌運其所樹立固雄偉不常而臨陣決勝指麾馳驟無能當之者蓋得於馬力居多然則馬之爲龍昭昭也乃千有餘載予夢中歷歷見之一何竒哉於是諸武氏跪而言曰惟我鄂公生此朔方靈憑於茲凡軍旅所向咸有陰助吾人藉神威久矣廟貌不稱何以振揚士氣乎於是諸耆民跽而言曰惟我鄂公併蒙茲土民有寧宇歲時禱祀應靡不預患爲之駟而災爲之禦吾人蒙庇久矣祀典不修何以慰愜人心乎予曰噫哉夫有功於民則祀之能捍大患則祀之神兼焉矧赫厥靈於夢寐是神之冀也民之望也而亦觀風者之責也盍祀哉盍祀哉乃語

冀北分守范君暨邑尹謀新之乃爲正祠三間轟如也爲左
右廊房六間耳房六間櫛如也爲二門三間大門三間翼如
也圍以堡牆周六十四丈一尺有奇曠如也戢如也地仍於
舊紀芳躅也費出於公杜私擾也經始於去秋七月十日落
成於今春三月念日周綜理也復買近地一頃以給守祠之
役圖久遠也聲以鐘鼓樹以干旌俾耳目有觀聽也祠宇旣
成廟貌攸安瓣香瞻拜宛若夢中見者於是士氣奮揚人心
孚悅適范君擢口北分巡周君以山西督學來代暨吳尹復
言於予曰鄂國見夢於公豈惟其祠祀是崇哉亦將賴公文
以垂不朽予曰有是哉顧予安能文之雖然公之助業載在
青史者則不可不勒諸貞珉以告於世子謹按史稽首言曰
嗟嗟鄂國其真古豪傑士哉方其崛起兜鍪中遭際英王乘

時奮翥嘗先登陷陣擐甲而擒世克攘臂而平黑闥舉旗而
降建德奪槊而墜雄信一時智勇如衛公褒公皆自謂莫及
則公勲烈豈不巍然出諸將之上哉然世人皆知公雄勇冠
軍至論公人品世未必盡知也予嘗究公爲人大類關雲長
云赤虬飄颻卽髯絕倫逸羣也所向披靡羣雄膽落卽關威
震敵國也躍馬突陣而脫秦王其視解圍古城者無愧也擒
王琬萬人中叢刺莫傷其視馳刺顏良者何慙也關於昭烈
投以肝膽公事太宗攄以赤心尋相之誘不去建元之賄不
入其精忠大節相符契也關乘赤兔公得驪駒類皆龍種蓋
天所默賚以弼成雄奇卓絕之蹟者又相脗合也雖關不幸
死國事公幸而興唐其大都實等埒焉然此特論公人品耳
至其心術之微世又未必盡知也是故席次憤毆人謂公爲

非禮不知公忠義不容奸邪乃其天性視誤國之許敬宗懷
奸之徐世勣不啻犬豕肯甘與爲伍哉富不易妻人謂公守
已介特不知公因是悟主使當時知此義則才人不選貞觀
無養虎之愆昭儀不立永徽無牝雞之惡又安致顯慶以後
紛紛哉噫此公處心積慮之微世莫能知者予叙公勲業因
白其心如此俾後爲將者知先立根本毋徒視勇略爲也嗚
呼方今邊郵多警安得如公者坐鎮帥閫叱咤風雲使敵人
不敢南牧以抒當宁西顧之憂哉予聞朔俗好勝負氣慷慨
磊落士多生其地庸知不有繼公而出者哉文信國曰歿不
俎豆其間者非夫也今廟貌赫奕人心敬仰又庸知不有興
起奮勵思接武俎豆者哉予願公靈當默佑於斯也范君諱
大儒山東霑化人庚戌進士周君諱斯盛陝西寧州人癸丑

進士吳子諱國貢登州府人貢士於茲籌義殫力克襄成事
例得書云

創建平順縣記

顧鼎臣

天地生萬物物極則殺之生陽也殺陰也殺亦生也人君生
萬民民不軌則殺之生仁也殺義也殺所以爲生也其道一
也是故明君治天下法天地之道握生殺之機以成仁義之
能垂衣高拱而四海晏然紹統歷業百姓賴利焉潞安府之
青羊山蟠居衍迤幾二百里巖岫巉巖壑谷深窈迴巒疊嶂
長林叢薄屏翳阨塞四方亡命往往竄匿其中且水土湍悍
而風氣陘鬱生人多克頑獷戾兼之隔離官府無有持尺筆
挾寸刃憑陵而誰何者賊首陳卿父子世濟暴惡糾集逋亡
脅誘蚩愚禦行旅掠村堡焚蕩屋廬擄刈人民有司務掩害

養亂者二十餘年嘉靖戊子巡撫都察院右僉都御史常道始宣露逆節請討之既而謀議不常操縱無狀賊勢益猖獗天子震怒命將出師復調集山西河南山東官民兵會勦閱數月然後平之捷聞今少傅兼太子太師禮部尚書武英殿大學士桂洲夏公時爲兵科都給事中請簡命素持風裁給事中一人往覈功罪并區處地方事宜以弭後患上俞之卽以委公公至則宣皇澤申國憲別淑慝明賞罰洗刷污穢振撫創殘人心大愜以和公親履賊巢周視山川歷陟要害歎曰賊之弗戢形勢使然非建縣設命吏以彈壓之難免後虞僉以爲然乃咨詢相度得吉地曰青羊村者林巒盤紆形局軒豁且據諸山之堂奧可以控制四表公諮於衆曰非斯地不可會巡撫都察院右僉都御史王君應鵬暨藩臬諸司羣

謀協同乃議割潞城縣所轄地一十六里壺關縣十里黎城縣五里共割地方三十一里以爲新縣版圖凡一切計慮纖悉罔不周詳抗疏陳便上報可因錫縣名曰平順命下有司鑿往圖新翕然作而行之召史繪圖辯方定位鳩集工徒卜吉以從事因山爲城因城爲隍延袤方二里許闢東南二門構橋通道宅城之中近北建縣治繚以崇墉冠以麗譙門屏廳廡庫藏廨宇土地祠吏舍監房小大畢具陰陽醫學旌善二亭咸置於大門之外其他若儒學僧道會司倉廩舖舍教場養濟院城隍廟山川社稷風雲雷雨邑厲諸壇察院司府公館凡治民事神造士賦政之區準舊規備今制咸極一時之觀又設玉斗崖蟠溪峰白雲谷巡檢司三玉峽虹梯關二剗治險隘以爲通衢八蓋於禦暴已亂保障之備特加詳焉

經始於嘉靖八年九月望日告成於嘉靖十二年二月朔日
凡財用取給於公家力役則僱募亂後餘民而他府州縣毫
分不預焉蓋事之始終經營規畫悉出公一心之存而巡撫
藩臬諸君贊相以成之然非聖天子倚任忠賢勿貳勿疑其
何能盡嘉謨以豎此瑰偉之績哉抑斯舉也人足以勝天理
足以制氣是使繹騷甫定之民寧茲新邑養父母保家室長
子孫永去危亾之禍而享太平之福其功不亦大哉夫當賊
之破滅也天誅之行止於元惡而脅從污染非特宥其死命
且容養匡翼務爲千百年之圖是殺之之意何其薄而生之
之意何其厚義之裁制何其精而仁之覆囿何其廣也亦猶
天地之殺物於窮冬纔旬朔爾而生養成遂乃歷春夏秋三
時焉是雖一事之微而聖天子裁成輔相傾否爲泰以嘉靖

萬邦者宏謨遠略從可識矣少傅公今日密勿機務弼成治
理以垂名於竹帛亦於是乎基之江西右布政使李君崧祥
昔以按察司兵備副使嘗預謨議舉職守思惟一時政令之
大不可無紀也特走狀京師徵予文將刻諸石以昭示無極
義不可辭乃爲述其梗槩云爾若夫經費工徒規制度數大
小諸司從事名氏之詳不遑殫書令刻諸碑陰

重修唐叔虞祠記

蘇祐

唐叔虞周武王子成王弟也始封爲唐侯其子燮因晉水更
號曰晉有祠在懸壘山麓不知創自何代魏地形志曰晉陽
有晉王祠又通志載祠南有晉王墓北齊天保中大起樓觀
後主改爲大崇皇寺唐太宗義師之起嘗禱於祠下貞觀二
十年有御製書碑在焉晉天福六年封興安王宋天聖間改

山西通志 卷二百一
封汾東王元至元四年總管李公修建殿宇及宮侍武衛如王者儀詳見提舉學校弋穀所撰碑記至國朝洪武四年改稱唐叔虞之神歲以三月二十五日有司致祭載在祀典自元至迄今二百餘年棟梁摧折不蔽風雨神失所棲祀事弗虔其旁有所謂聖母祠者香火日極崇奉而唐叔虞之祠顧寂寞水濱不知爲正神其所係豈直辦香酌醑已也嘉靖二十六年冬憲副李君乘雲憲僉朱君徵以其事關祀典而風化之道攸存具以請於予與巡臺因檄下所司撤而新之復增塑其象左右各建翼室若干楹於是金碧丹堊煥然改觀足稱報祠矣祠前有八角池右有善利泉山畔有望川亭讀書臺亦以餘力載浚載修古跡用復是舉也貲因於水利工出於僱募官不告勞民不知擾知縣侯瀾縣丞李侃主簿高

魏典史張珊共事惟勤而鄉大夫憲副高君汝行實倡義協衆尤有力焉往予自按部未幾有藩參之命暨今蓋三歷晉矣議初協也得同於聚菴谷子嶠事告成也而翠巖黃子洪毗復嘉其成焉大參潘君九齡告高君曰是不可無刻以昭永久爰佐以汾陽山之石而高君因具其始末乞文於予竊嘗聞之利萬物者莫善於水而其動萬物也莫善於風利非導以禁之則爭風非端以揚之則悖欲淳化宜民難矣今祠在晉水上民之利其潤也方日詣他祠事報祈乃叔虞自剪桐啓封歷世與周久遠則其功德於斯土可考也顧祀者反後而使其祠日頽曷以示風向參藩時嘗爲均水利刻石稽弊以戎務方殷未遑克正祠典則日夜罔遺於懷者也乃今亦克並舉利以滋養風以弘化豈惟晉人獲樂利之休司政

紀者亦將可憑藉矣爰爲著其相關重者俾刻諸麗牲之石
復爲迎降送神詞三章使登歌焉詞曰春日兮載陽萬卉潔
兮齊芳撫春草兮織露布陽澤兮未央相羣生兮永情服舊
德兮奚忘秉玉圭兮下視振鸞和兮琳琅豈吾人兮善享懷
遺土兮斯皇儷對越兮暇豫穆將愉兮樂康右迎神浴蘭湯兮
襲明衣芳菲菲兮未有違拊鼉鼓兮鳴瑤瑟陳歌舞兮揚清
暉靈連蜷兮紛晉橫四顧兮依依繫靈雨兮灑塗載輕颺兮
滿旂御龍駕兮雙導紛武衛兮揚威審五音兮按節歆蘭蕙
兮具腓卽光景兮可挹蜷局顧兮憺忘歸右降神撫川原兮極
目羌儵來兮歛往美要眇兮狡服鑿羣忱兮旣享鞭玉蚪兮
執綏指天門兮方廣猶招手兮山間儼遺蹤兮水上山有木
兮水有蘭中有懷兮何敢言覆我兮怙我顧我兮甕山之左

萬祀兮千秋御斯宮兮夷猶

右送神

登恒山記

楊述程

余夙覽五岳圖思嚮往其地久矣已酉歲奉命觀察雲中恒
岳實居轄內辛亥春欲以祀典往謁岳神緣邊境不寧余爲
計防禦事且不暇是歲孟冬廿日直指潘公觀風澠水故事
兵使者以分疆例得陪視明日潘公將有事恒岳余導驄而
往南行十里許至磁窯口兩岸峭削如門大類吾鄉劍閣諸
峽泉流峽中澎湃奔瀉潏澗澹澌如建瓴而北爲神川云此
處山光嵐色皆莽蒼蔥鬱不似北方景川之東鑿石繫途草
橋木磴又大類吾鄉連雲諸棧上有石窟架閣猶餘橫木數
千蠡剝欲盡傳者以爲宋初把守三關處也磁水東壁有坊
聳峻金碧輝煌題曰高山仰止者卽岳遠門也門有殿庭數

楹宏敞高峻左折而上三四里峰坡崖壑之類宛轉曲折地
饒青煤偃僂曳販者肩相摩也紆行數里道益湫隘余乃易
便服憑小輿兩掖而上爲雲路初步處下窺山門已不啻數
萬雉矣級益高階益峻頃之過望僊亭仰視飛僊崖閣若懸
層霄之上已而歷虎風口崇岡蹲踞風發颺猛則響振林壑
間路傍西望渾渾灑灑吞吐雲氣者白龍洞也前不百武有
白虎峰堆石雄列居然白額狀落澗西杪似有木香茶蘼之
屬則所謂紫芝峪也欲爲採茹而芝已烏有此處線道蜿蜒
幽深百仞遊者每慮觸險側足詳顧猶虞顛越山迴路轉古
榆數千百章葳蕤蓊茂最大者名雙離樹株可蔽牛而蒼枝
連理若蚪龍軒舉之狀人以為果老繫驢樹云崖東有得一
峰菴因名之余爲釋斯名一爲水於卦爲坎是北岳奠極義

乎岩西則萬松深處亭曰翠雪六花飛墜四壁凝寒瓊砌瑤
階眞銀世界也山腰少澗誅草爲堂白雲縹緲簾櫳清曠差
可憩休時聞樹籟鳥聲心肺幽暢令人生翛然物外之想堂
畔有龍泉味分甘苦禱雨輒應有夕陽巖松檜插漢晚霞及
之則樹色蒼然崖產石脂五色晶瑩味腴堪咀意僊家啖人
藥餌而特不識所以調劑者傍有石洞一隙露丹竈遺跡深
奧莫知底止是謂通元谷人跡莫到也三丰曾居此谷有俯
視羣山螳垤低之句迤透尋上可百步許入貞元殿展拜元
岳琳宮寶座峩在清虛境神面正南視五臺諸山環向北拱
森森臣庶界華夷而稱帝尊埒四岳而號北極非耶珉碣瑱
碑磊立崖壁雖代有修設而遡建則自陶唐封濬時始也殿
杪蒼松古檜圍喬參天枝葉扶疎良爽炎燥殿隅西躋上越

二三里朱門扃鑰甚固啓之則會儒府也怪木壽藤樛互映帶赤石鍾乳之類錯出其間抑黃茅白雪之遺棄耶西頂有琴棋臺儼在雲端舒嘯四應敲拂石亦成聲豈爛柯流水所從來乎頃之轉步則歷果老嶺策蹇蹄跡依然在焉其東頂則爲大茂山殿碑云舜巡守詣此山谷正擬登祀值大雪弗能進而遙祀之俄有石飛墜帝前遂以安王石名五載復守其石載飛曲陽帝命卽其地祠祀焉其飛窟尺寸固安王石符券也余因感而竊歎曰維岳降神自昔記之方今塞塵不聳神京晏如雖云聖天子威德遐邇微岳威靈鎮壓宜不及此獨奈何祀封爲缺典也禮畢稱觴直指公對坐嗒然忘此身之在塵世也已而夕陽落照霞彩盈山將乘輿爲懸空寺遊返渡神木衝騎暖泉見西壁峭陡樓殿架疊燦如來寶像

真所謂空中樓閣鳥道一系攀而上躋竒絕亦險絕沙彌三四清磬捻香供茗作禮酷似羲皇以上人余亦恍遊羲皇世矣月影半明更漏三滴甫抵州署曾不覺往復之爲勞也爰搦管而紀其事

臨縣修城記

孔天印

臨縣望河阻山介於興嵐汾石之間近塞邑也然民儉而足城小而窳以故虜入輒犯隆慶元年丁卯九月虜大犯至破石州之城劫汾州之堡而臨之危爲甚虜退去當道乃下令繕城仍調選才吏易補沿邊郡邑時關中人吳潮以榮河令調臨至則省覽諮訪稽民物之利害條政事之緩急登陴而望黃雲紫金諸山則喟然歎曰始吾欲崇墉以甃今觀其土石之蒙冒林莽之蓊叢則甃可伐石而代也卽析薪以煉灰

不事省而功倍乎於是手畫心惟夜思蚤作募匠師徵力役
公計料廣揚權備器用儲口食既定方略獨斷準裁簡委羣
能躬勵督察遂運石成岸積灰成邱趨事踴躍磬鼓弗勝以
二年戊辰四月起工七月竣事其包土城而爲石也廣六里
五步高三丈五尺其直如繩其方如矩其淳如淵其峙如岳
其密如櫛其堅整如鑄而女牆樓櫓天棚旗幟鎗砲矢石之
類森其上重濠疊塹品窖伏鋒戰車湧械之屬羅其下當是
時地無百雉之築而險有金湯之固環視旁邑莫茲之爲強
矣兵憲范公閱而嘉之乃狀聞當道咸加幣褒美以獎其勞
焉庠士趙應秋陳遺規等因過汾請余爲記夫疆圉之臣恃
安而忘危惕守而忘戰以至遇害而無備臨敵則敗衄而不
可支若離石之難是也乃吳公善思患而豫防必有備而無

患矣夫折柳樊圃狂夫猶懼况設險有固於山谿者乎昔公
輸般爲楚造雲梯之械將以攻宋而墨翟先往禦之請以試
其術墨解帶爲城以牒爲械公輸凡九爲攻械而墨九距之
又使弟子禽滑釐等三百人持其術以守宋城而公輸之技
已窮所謂善攻不如善守今度胡虜之智劣於公輸明茂之
宰賢於墨翟百里之衆勇於禽釐故虜雖復來而知其必無
患且公內治外嚴惠威並建之實文武兼資之良也是以其
涖官也多善政焉今勒石紀事專美崇墉識其大也

新設寧武兵備道題名記

李攀龍

山西三關先是蓋止鴈門一兵備岢嵐兵備實協理之其於
防秋尋加守巡冀寧二道嘉靖三十三年復以清軍屯田驛
傳若守巡冀南河東諸道迭出而分區監督焉三十七年改

鴈門爲鴈平岢嵐爲偏寧其五道監督如故明年仍以偏寧爲岢嵐兵備以偏老岢嵐河曲四守備西路叅將老營遊擊地方兵馬屬之鴈平兵備仍駐代州以廣武北樓平刑三守備東路北樓太原叅將地方兵馬屬之其八角利民神池寧武四守備中路叅將地方兵馬則以設今道云從御史楊公益美之請也惟是三關與大同相爲表裏右衛水口等處直虜南窺朔應諸州之道其於要害視三關有輔車之義卽虜一道出沒我得以所直道兵馬掌距踵襲而自相爲應何慮不及三關延袤乃至八百餘里而虜得以探疏數爲堅瑕揣薄厚爲虛實時分時合雖漢兵如雷風安能八百里趣利也惟是席國家廣大守在大同云爾曩時則鴈門一道岢嵐一道協理之足矣然猶恃藩籬以撤閫闕不知中彊者外益固

之爲謀周也亡何以二道爲不足加之守巡冀寧二道爲四道復以四道爲不足加之清軍屯田驛傳若冀南河東諸道爲七道三關凡八百里而七道以臨之卽有五叅將一遊擊十一守備亦惟鴈門岢嵐二道相信而服習五道者非常所屬卒然不相爲用十羊九筆猶之愈數而愈疏清軍屯田驛傳曠所司存冀南河東棄所分署是盡山西而事三關委境內而勤一圉猶之愈實而愈虛不知疏數以形明虛實以制槩也注鴈門以鴈平注岢嵐以偏寧似矣不知十一守備分地如石畫相交尺寸獨以八守備隸偏寧一道亡論石隰諸州防河之役行兼坐累有妨簡書卽虜一出套便涉其境而亭障積阻烽火復游已難爲卒又况仍以五道便宜掣肘糜費無益豈所謂明形而槩制乎時已權生變已常存寧武之

介於鴈門崑嵐之間亦猶鴈門崑嵐之左右於寧武疆場之政雖力有餘不備非其域雖勢有餘不守非其約非其域不闡出微功非其約不聲援爲德辟耳目之於視聽不相假借然後可以著官知之良而稱同心亦使朝廷得以責所不備按所不守以其所守捷無倖賞挫無佚罰三關猶一體也省冀寧若清軍者七道而爲三以重司存養內治境內不疲於奔命三分其八百里而勞逸均各可以朝檄而暮集而齊一其指使凡五決策以設寧武道而議始成如此豈偏見一時之利害不參邊大計始終者右衛水口爲虜必窺之道卽中路叅將直之與大同兩掖犄角相逐銜尾相隨厚集其氣是顧是隈者非寧武乎與偏頭鴈門翼擊而夾攻爲常山蛇勢者非寧武乎明形槩制以回視聽新旗鼓出繕入計爲邊長

老貽數百年之利身自作始者非寧武乎形不自勝制不自舉沈公所謂非人哉首至者未幾論罷繼至者尋以遷行沈公明形槩制三年於此矣乃少司馬萬公某獨以少方伯奏留之豈不曰分地不量形與無地同量形不善制與無形同善制不得人與無制同得人不久任與無人同是二公者先後奏請蓋相足焉可謂同心謀國重惟沈公之賢適與設會也因具列之使後之君子得以觀寧武道所繇立者蓋以其人如此云

重修海神河瀆廟記

張四維

皇明奄甸萬國徧禮羣望凡嶽鎮海瀆成就其近域崇建祠宇令有司歲時修祀國有大事特命使臣將祝幣往焉蓋自郊社而下祀典莫此爲重蒲郡介河曲當禹貢所稱龍門華

山西通志 卷一百一十七
陰之中重岡連抱川靈聚結故西瀆大河崇於是而曰西海
附焉其廟制閎鉅正統中知州事關西張侯廉奉勅修建歷
久漸敝會嘉靖乙卯之變一切傾阨雖頽墉斷木靡有遺者
有司歲時埽壇曰祭天子前後凡遣使三至亦咸祇陳香幣
露禱而已殷禮弗稱神罔攸宇至隆慶庚子夏河水暴發瀾
漫郊郭奔奏西北二闔是時淮徐間連歲河決漕道艱阻議
者咸謂神宇宜曰時葺用祈靈貺於是巡撫山西副都御史
楊公綵巡按山西御史饒公仁侃桂公天祥俞公一貫會檄
河東守巡叅議馮公叔吉僉事劉公宗岱相垣址議規度曰
重修二廟爲請天子俞焉其經用所需卽取之三院歲解贖
緩之餘者而以州帑裨之經始於隆慶壬申十月越再歲萬
曆甲戌某月而工竣二廟並峙左河右海廣輪崇庠無尺寸

異其爲正殿各七楹殿後爲寢殿各五楹殿東西爲風雨雷
電祠凡四座楹殺寢殿之二其儀門楹數準寢殿焉堦墀內
爲井各二俱覆曰亭碑亭視井亭之數建儀門外其外門則
曰大坊表之內環曰連廊曰楹計凡二百八十有六外繚以
磚墉以丈計凡三百二十有二以及宰牲有亭齊宿有所而
制度大備矣廣廡翼翼芬橈高舉邃深軒豁金碧輝煌信足
曰永奠明神系一方之瞻向已郡守陳侯以朝屬維爲文紀
成將勒諸堅珉曰徵久遠余惟名山大川類能興致雲雨施
德博大故歷代尊命咸秩祀典河初祀朝邑唐開元中以西
嶽祠華陰緣有司禱將靡逮遂徙河祀而東我高皇帝釐正
嶽瀆名號刪定禮秩薦享牲粢靡有等殺又常御製祝詞遣
功臣將祀良曰嶽瀆之澤物同則其報禮同也乙卯之變嶽

瀆廟同圮廼嶽廟匪久卽復合二郡之力徵費凡二萬餘金
曰速集厥事河海廟乃委爲瓦礫區者且廿年陳侯肅承明
命知國之大事在此旣不欲苟且曰俟後人又不欲加賦曰
滋衆擾殫心夙夜惟求曰隆國典安神休是務於是監司諸
公嘉其工繕之鉅商較財用慮有不給謀所以佐厥費者廼
總督宣大王公崇古則曰軍門俸給巡撫朱公笈則曰各色
會稅香課布政使史公直臣則曰帑積羨銀分守馮公叔吉
則曰罪贖曰及官民之義助河堤之贏積通計凡九千餘金
蓋費視嶽廟之半而閔麗幾與埒矣用省而財不匱事集而
民不擾神用悅懌歲以大穰信可曰荅天子尊禮方望懷保
兆庶之深意哉是用紀其興建始末稽經費述規制俾後之
嗣是者得有考焉是役也檄委而監督於上則平陽府同知

王大夫敬朝夕工所綜其綱目則蒲州判官曹君廷相其奔
走於下則榮河縣典史李于田倉大史侯汝封咸効有勞勤
云

西小池垣記

何東序

嘗考水不注川滙爲藪澤大者曰湖小者曰池曰沼湖陂出
自天造豐功及物池沼力墾而成妙用在人縣官總山海開
池禦致利以助貢賦上下足以相贍若解之鹽池天造盡人
湖陂之利蔑如矣其地左輔巫咸右弼洪流前趾中條後負
峩嶠園會四跨瑤璠晶衍薰風一扇萬寶皆呈蓋唐虞中天
之會造化專與之淵也唐故名靈慶盈涸有時置吏置亭戶
至雜遣司空度支雖與古今相始終而綆剔斂發猶未得其
術焉今稽古應時特重權鹽之制自郡縣而至轉運轉相鈎

較而專以御史臨之平輕重而權本末均課辦而佐軍興法至密矣歲督十三郡縣徒作中程收算四十二萬引移用三藩唯是恒雨病沒恒暘病涸以地聽天其勢不能兩得則有橫汙附池者六曰永小曰賈瓦曰金井僅存其半沸涓澆曬迄今茲無數也備通變張弛之故充節口并日之需頗收算可數萬謂之小池鹽先是繚以短垣淹久齟朽莫弭盜攘陷民於罔從而獵之以刑殆與開闢牢而發以毒矢何異按其地者阻事墮議游更三紀而莫之或恤間驅鹽丁版築蠶午未幾而操畚鍤入池矣萬春戊戌頤所汪公來按蹉昭智集思課正賦以待邦之大用斂餘貲以待邦之小用經產雜出燦然皆有菽極暇常監輿循行不遑假寐日討墜典焚綱而申飭之帶財曲獻野廛奪魄公披龍鱗蹈虎尾探絲分於剝

牙鑿齒之中得司存賑濟銀若干議徒詳費儻民之流冗者鳩而受工殆二千人訖計週池爲垣爰高予厚增陴其上金井賈瓦合爲一區丈週一千四百永小自爲一區丈週四百池各門一廳事五未事人給贍家二銖旣事又酬食米四銖悉之金以千餘肇興三月丙午五月丁未告成悅使民忘其勞子來成之不日劃址墉隍卑增薄培底填淤加肥之績絕窪坳重埶之患國寶在野柙之惟謹利用厚生池無小大萬商皆當仰此公之用菲其意蓋弘遠矣運長佐閩山林君東阿馬君永嘉陳公等屬余紀其實余惟御史奉綸遐察歲一往代未有及瓜不代者合符優游阜囊特達常條適事或未裨於觀風之本公一往三見瓜期當宁倚毗無二所急朝夕所患靡盬至暑雨風寒暴災匱薄而不以言憊李梅實衰五

穀熟虧消息之數天地不能以兩盈公升禮昭縉交修容典
賸祀池神條山風洞創祀太陽之宇斬雨斬暘而無之弗告
精靈肝蠻齧花冬實述宣醲花薄海風回羣小不奉私求萬
戶鮮藏匹夫呻吟奪魄之聲未必不為改蘇頌德矣觀一節
而知百節固知應條之吏蔚蒸太平恤生之倫咸獲嘉祉殆
不止一池之利鈍已也不佞草民黥淺惡能究其端倪焉蘇
老三池今涸不載

山西通志卷第二百七

山西通志卷第二百八

山西巡撫都察院右副都御史臣覺羅石麟奉

旨修輯

藝文二十記八

明

總督二鎮題名記

王家屏

周制九伐之法掌於司馬四封之守領在諸侯不以將名也
有事天子授鉞上公俾發諸侯人備竟上不責以戰也自秦
上首功將始重漢勤遠略大將軍驃騎將軍之屬分道四出
將始多然莫能相攝也唐制節度假以旌燾威重無與比而
建本弱矣宋懲唐弊稍裁損方鎮收其權乃推擇非人徒署
虛銜遙領委任又頗疎焉國家奠鼎燕京北控大漠並邊要

害置重鎮九而以三督府統之在宣大三鎮者直單于大庭視他鎮倍重府初建朔州以嘉靖甲辰移陽和其置帥自太保石公而下間有以規邊督饗至者而督戎實其專任焉往少保鄭公帥鎮謀礮石題名節堂屬屏爲記未就旣解官山居少保蕭公以書見趣屏曰此夙諾也曷敢辭屏嘗讀易至師而得聖人謀帥之指云其繇曰師貞丈人吉丈人者勲德猷望衆所推尊信服者也乘剛統衆是爲二之師中獲上處權是爲五之長子以之帥師險而順律而臧用能懷萬邦承天寵故吉也參以弟子則輿尸凶矣弟子用衆蒞事可以爲衆卒將不可以爲衆將上衆將之將合羣策羣力以成臂指之勢視不下裘帶而慮周萬全令不煩鼓鉦而精神渙號於千里其筴事不使衆知則不明使衆知之則不密曲徇於衆

則無斷不協於衆則不孚故將莫難於御衆而尤莫難於御衆將衆將之將誠非丈人不能任矣鎮自有督帥以來任不任非屏所敢知据所覩聞能綱紀將吏以扞蔽吾疆圉保聚吾生靈者其名與其勲德俱存殆不啻家尸而戶祝之矣乃威愛失衷張弛虧度者民亦無得而稱焉大抵民所歌舞必師之丈人也所不譽必師之弟子也則亦不待鐫名於石近而察諸行間寵上之口法戒炯然備矣今上垂神泰寧祇率先皇帝遺烈天覆匈奴羈縻弗絕帥臣用邊勞久次任習戎索亦式克興造緒業奉宣天子之恩威以是匈奴畏懷服銜縻彌謹邊氓得離鋒刃之慘衽席於儲胥而歲所省度支金錢且復數萬計國與民益兩受其利焉而議者猶不能無慮率右戰左欵欵固不可恃也戰獨可恃乎夫戰欵兩者馭虜

山西通志 卷二百八
之機宜非自治之本務也誠使封疆諸將吏守土者繕鄣塞
理賦者實倉庾親民者拊凋殘訓士者厲精銳虜卽世保
塞不廢欵安也一有未飭朝罷欵而夕戰勝危也安危之幾
惟丈人能晰之得一丈人於師中諸將宜踴躍受署慮無不
効力於封疆者而本務舉矣由是戰可也欵可也權虜情淑
逆而游環於兩者之間可以坐而制羶裘之命收勝於不窮
卽更千數百年無能易斯術也圖師貞之吉者尚慎旃哉是
爲記

陽和教場碑記

九邊之節制三而陽和特重山西宣大諸軍控制倍難也鎮
卒隸督府標下者三千其分隸三鎮聽虎竹徵發暨土兵若
戍士又數千析左右兩營營置裨將一人領之春秋則督府

都試其衆而課殿最焉欵後垂三十年邊城晏如訓肄頗疎
歲乙未少司馬懷棘王公奉上簡命來總鎮師鰓鰓勅諸將
吏徹桑畜艾致核于軍實明年春將舉振旅之禮于閱武場
場在鎮西北二里許旁近皆民田也公謂是不可馳馳犯禾
病民乃與兵憲徐公謀規宏其制而屬郡倅王公董厥役割
場之橫地易民田縱橫得六百步繞周垣而設溝塹植柳可
千餘株四隅設烽臺闢東西南三門表以棹楔而轅門巋然
獨峻中央築臺二丈餘亭其上凭欄四顧山川城郭形便要
害歷歷在目臺之北有堂三楹其前有臺申軍令處也前左
列軍牙其直于霄是爲致禡用鉞之所臺左右隅各亭三楹
以居中軍裨將堂後寢室五楹翼以軍厨椽舍其左右廡則
材官劍客直焉堂東西百步之外有射所六所各有監射亭

三楹井竈皆備汲爨便之經始於春二月秋告成適當治兵之期至日將校畢集表下公按行壁壘升武帳肄以戰陣之法於時旛旒蔽空鼓鈺鑼鐸雜以藜礮之聲殷振山谷材官銳卒超乘破的箕張翼舒各各如律終其事不譁不揚肅如也閱竟大發金錢牛酒賞賚有差公于是喜甚以爲士練可用使徵記于余余惟原圃具圃之闢講武所從來矣而于郎之狩北蒲之蒐春秋譏之不時不地故也若其休和輯睦則惟我晉之先公被廬綿上之績稱焉公今以春秋耀吾甲士時不違農地不害稼先民而後修其教於兵兵玩治之以威旣威訓之以律技擊合於節制其有晉先公之風烈乎然文公僅僅出谷戍釋宋圍一戰勝楚終悼公之世不過和諸戎俾爲不侵不叛之臣無敢離邊如駒支所云而已公精神渙

汗不出壁壘步武間而聲靈赫濯數千里外佐宣聖天子無競之威孰敢二于軍吏以煩斧鉞不靳於用而靳於備將所謂居安思危以待不虞永持至寧之長策蹟與天壤俱存可焉

徙河築城記

范守已

隰州城志稱唐武德元年築景泰二年同知李亨修乃城北一里許又有古城故址則今城非唐築明甚按五代史周顯德五年建雄節度使楊廷璋以都監李謙溥權隰州事未幾北漢兵至諸將請速援之廷璋曰隰州城堅將良未易克也北漢兵攻城果不下是時去唐未久唐城無疑故高堅可守今城不知創自何時痺薄隘甚自景泰間李亨修後又一百五十餘年矣未聞有大興版築者其城居東山之麓東據高

山西通志 卷二百八
阜西臨紫川水因勢爲崇卑側向水滸而川流上受高唐溫泉蒲子諸山峪泉源總至暴漲亡時城常被其侵嚙萬曆辛丑秋淫雨連月山水猛急鼓浪奮擊不輟城西北隅崩至五十丈餘居民懼甚其他處頽損亦多是冬余來視事廉知其狀急欲修築而沍寒土僵不能施畚鍤明年春三月請於攝道事按察司副使詹公思虞直指使汪公以時大中丞白公布繡爲糾丁夫六百餘人先徙河流使勿進城塹爲版築地而川中土石雜揉猝難鑿濬至五月終乃得成渠導水西去復聚石爲長堤以防侵軼之虞工方畢而暴雨立至矣是月巳丑薄暮雲起西北隅大雨電以風雨雹兼下須臾水深數尺雨止余聞城外水聲碎洶勵急使人覘之則白浪沸騰約高數仞許石堤漂沒無遺直擊敗垣城不浸者三版耳先是

州宅內有鬼憑人而語舍中兒患之余禱於城隍亾何有神降於宅內擊鬼有聲喝護備至余德神敬事之至是水急嚙城余禱於神乞收水而徙其流神憑人傳語許之於是迅雷起中庭神去行視水形矣戊夜復傳語河流徙畢可躬閱之余起出城諦視則水流西山下涓涓若衣帶耳城塹外土石壅起若長堤然而所鑿中渠亦淤塞無蹟初西山下土高石堅勢不可穿濬非數千人兩月力不能就至是一旦成渠長二里許水流其中人皆以爲異余集士庶恭拜神貺喜免嚙城之患云是秋乃爲築城計伐石爲基錮之以堊乃先掘地及泉布亂石燥土隱以金椎使堅厚加方石疊砌高丈許厚二尺許以障土而固其基外復爲複道濶八尺亦用灰石錮其藩高與基等俱取西山膏土實其中而築之督趣兩月冬

初乃成明春始徵芟樾築城於基上五旬而竣上用甃甃爲
埤塊巖礫栖雲保障有賴又於隍外築堤百餘丈北起平臯
南抵故防濶二丈有五尺高丈餘以遏川流之橫溢者浹旬
亦成皆採薪木爲箇實土其中纍纍如貫珠聯置堤中而築
之可資永久又北門之內少東及東城之外東南隅之內南
門之水竇崩墜各至數十丈廣狹不同亦分發丁夫先後補
築俱不浹旬而竣其用方石五千七百二十尺石堊萬有八
千四百二十觔芟樾三萬有三千五百九十二觔棧木五百
五十六杆而城垣復固無復嚙毀之虞矣是役也前判官吳
永煌吏目王天子督視有功義官竇貫等分築効力余以不
德叨總其事自愧未展一籌第賴神明降鑒收奔浪徒急流
拯州民於魚腹措城陞於石門使修築有緒漸次成功神之

造福斯民爲不淺歟故睹河流而頌神之功不衰乃敬紀其
事以示後人非敢曰貪天功爲已力也

重修黃河石堤記

王崇古

粵稽禹貢禹導河積石四曲下壺口東流直衝蒲城西岸城
依河爲塹歷城南流經雷首復東流遶蒲南境迴視蒲城在
河中央歷代表蒲爲河中郡建河瀆西海廟祭於委禮也蒲
城河西爲大慶關夾河對岸每夏水漲歲多衝陷唐開元中
東西修石岸鑄鐵牛繫鐵纜維浮橋歷代河患頻仍河西石
岸鐵牛俱崩沒大慶關基地洗剝殆盡東岸勢迫蒲城僅數
丈明初河崩城北前守臣常建河堤外樹椿木內填土石頗
稱堅壯阻河西移遺近河膏腴灘地數千頃民藉耕牧逮正
德中復東崩將及城隩時陝三原故端裕王公季子諱承祥

以少叅分守河東沿城創修石堤下釘栢椿上壘條石中貫鐵錠五十餘年城恃爲固士民誦之嘉靖癸丑雨水內浸堤間傾壞前守道東海杜公重事修砌僅完三載歲乙卯地道違經夾河東西大震城復於隍堤廟盡崩壞河流直與岸平每漲輒入城門歲壬戌河侵城南古鶴雀樓址城岌岌待傾時郡守嵒崒張公募民急運雜石數萬下填湍激逼水西旋城免陷沒隆慶庚午夏河大漲高丈餘環浸蒲城近城居民隙地田園皆湧泥沙數尺許惟瀆海廟基近河地卑水環注敗墉外獨未入民咸趨內避水說者謂河瀆有靈時故襄毅楊公家居議創修隄防顧州鮮積貯檢前甃磚城故牘括富民銀數千兩募夫沿河築土堤三百餘丈衛城垣越五六載水衝浸堤半就圯萬曆庚辰夏河自迤北南流直衝蒲城西

岸古七里渡日崩數十武迫古護岸勢將直抵峩嶂原遶出蒲城東南矣士民震恐罔措時守道王公方奉檄入賀萬壽率郡守何公肅祀瀆海廟倣張嵒崒故事運石填湍瀨稍殺內侵王公行卽以事狀白撫臺高公請建石堤時當宁方務節省戒興作高公重難之王公執議拯溺恐緩則莫救蒲郡萬室宗戚士民咸懼胥溺隄當急建費誠難恤高勉王公行俟徐圖之時武林宋公署守道事何守復具狀告急宋公軫念民殃親按視河勢如痾瘵在躬撰文責已虔禱瀆廟未幾水漸緩卽鳩工估費先河衝激起七里渡至古越城計五百三十四丈中分東西二段東高十二尺西高十尺底濶四尺頂三尺計用工料銀六千七百有奇費頗鉅民恐復嚴搜括咸思逃避予聞切殷憂力白臺司請議發官銀易木石率民

力事工作庶公私兼利宋公目擊民艱執議固請軍門金台鄭公洎高撫公按臺新安黃公鹽臺德清房公皆報可乃檄平陽郡守南陽王公盡發府貯歲收各屬大戶餘名銀如數充工用定委先通府今州守遼陽鄭君至州率州判延安王君珣專督工作何守司出納募民領價覓栢椿石匠採石河津之乾柴溝督縣尹閻君監打造臨晉尹劉君集窰戶卽條山燒石灰自冬徂春木石稍備復募沿河船戶順流運發刻期興作適守道王公丁內艱歸東海胡公呂大叅代任至蒲遍閱河澌相度水勢恐堤薄不足捍激流議石堤內加頑石三尺雜築灰土以固內基仍用米汁和灰砌石鐵錠貫注以固外凡三月而東工完夏水稍退免內侵又中秋後河水漸淺石運稍滯鄭何二君每禱瀆廟水輒增數尺至壬申春工

始竣北及城角而止沿城西面南至瀆廟故岸雖存率卑薄浸潰莫禦漲漫士民咸乞接修長堤庶保城廟宋公會胡公命鄭何二君估工費南北長七百八十五丈應用銀一萬三千九百餘中分三段高厚如西工期三年可續完二公復白軍門鄭公新撫臺安邱辛公按臺華州劉公鹽臺臨邑邢公咸允從事仍檄府王公續發銀如數督鄭何及諸委官刻期續修適胡公移鎮岢嵐隴右栗公以少叅代任至蒲首事督建率遵成議選委文武各屬分趨任事先完二工乃何守王判先後轉官去未幾鄭君擢守蒲畢力經營越三載而先後工竣高出河數尺上列女牆間設渡口屹然如建重城王公起復至都適栗公晉臬司巡河東王公復以原官補守道旣至而後工未竣仍督各官急催完工清查支費得餘銀若干

定議修葺城垣門堞之崩缺文廟學宮舜禹廟之破壞重建
首陽夷齊祠凡蒲境應祀故廟胥修飾維新率緣堤工樽節
王公經略焉通計新堤自北徂南長一千三百一十九丈先
後工費銀二萬六百有奇肇工於萬曆庚辰歷辛巳壬午癸
未越四載經始於王宋二公執議度費繼督於胡栗二公選
委運料大工底績前守何力任難虞心力俱竭今守鄭始終
督建四載勞瘁今堤成河遠城安民賴諸公之德施蒲民孔
厚惟予不文世家河中與聞二議樂觀厥成常期表實河滸
彰諸公具美翻思蒲古舜都當堯之時洪水方割河中先受
河患禹平水土旣載壺口卽今河津禹門斧鑿痕尚在歷世
旣遠陵谷變遷地道違經岸土易傾河流轉激東灘西沒遠
率數十里非禹跡之故矣官民隨勢堤防動至衝城沒壘民

載胥溺然非心大禹溺由已溺之心祇勤儉不自滿假之德
何克格神孚上下永弭水患今觀諸先後同心上下協衷克
建大工永障河患令觀河洛者思禹功蒲士民萬室奠安百
世永賴目覩河堤當思諸公功德如思禹云宜勒貞銘俾傳
百世王公諱基號對滄宋公諱應昌號桐岡胡公諱來貢號
順菴栗公諱彤庭號瑞軒王公諱如魯號確齋何守諱允升
號晉吾鄭守諱文彬號三橋王判諱珣號鳳池繼州判嚴汝
聘始終監造石運守禦千戶所千戶劉增榮繼統增曰死勤
事沒於工分委鎮撫段金百戶李斌榮河丞趙以莊猗氏典
史朱文林咸效勞績例得備書銘曰瞻彼大河源泄自天禹
導積石流蕩中原龍門旣闢東迤舜阡崩溺靡常陵谷變遷
爰恃隄障遏彼狂瀾河瀆有神監我民艱至誠可格濟危扶

顛有斐羣公一德後先四歷寒燠六易臬藩視民猶已拯溺保安協衷集思創建隄垣屹如山立蜿如龍蟠危城永保萬世生全澤流大河德並條山禹功可繼舜坻永延功垂不朽名勒青編受天篤祐君子萬年後有作者尚監銘言

遊五臺山記

王思任

形生者久氣化者幻則天之所施遂無壽焉者乎曰有之天無壽風壽雨而有壽雪三千大千之界予不能知而盤古之雪都於蔥嶺分封峩嶧支衍於五臺則今日之所及也滇之三果僧月峰曾爲予言五臺有佛雪紺者是萬年物子不可作舍衛三億人而萬曆庚戌予以遷客過繁峙正月閱寒銳然往觀之邑生鄭振之導焉由滹沱溯峩谿潺湲聽廣長舌也先得圭峰寺山顛肉土其堅踰石躋藤而上前捧一峰如

壁右蓄勺泉嘉靖中虜闖入谷民保焉鏃飛三日不下老僧以脫粟話古苦境也歷熊頭豹子蕪廢不別間關四十里所過人家俱在水車風柵裏投秘密寺木叉和尚修行處也今日秘魔巖路僅絲懸尋鐘愈杳凍嵐迫瞑人宿馬蝟劉繁峙觴焉而予同鄭生牛飲之蕪松投浴夢魂泠然掛峰西也次日禮佛看四山矩函欲知秘魔所以蠢頭陀蹙官哆其口而已三昧經云文殊將百億魔宮一時敝毀波旬自見老羸恐怖拄杖謂之弊魔意或芽於此巖之西有飛女崖相傳代州女不儷父母勒之投崖翼去自此披巒剝峭寒風積愁雲繁馬頭見有滄者纔數丈而到衣已繡成雪朶矣山盡豫章之材居僧苦其荒塞斧斤不力在在付之一炬樹故名柴木得雨之後精氣怒生菌如斗壯所云天花者也牧兒得一本輒

山西通志 卷二百八
易一縑是木胎稟兌氣辣飽風霜若勞萬牛回首徵出長江
則靈光突兀何必第魯國巍然而且尸之烙之腐之辱之曾
不知吾鄉六尺榆引聲價也雪甚遂蔽馬日宿獅子窩昔人
見萬千金毛嗥天吼法有宰堵波雄麗鈴語清越而綏綏者
入幌次日雪深數尺強以皮冠秦復陶上獅嶺踰金閣天忽
大霽日芒道道爭雪光眇不可視是時萬頃同縞雄含物魂
鑿度曾謂是耶溟滓之間窪窪盡閉碧青線界天正分其半
若不得天力薄劇則人在杳白際混沌不可知以故刻刻呼
咎如印印塗僥倖前僧穩熟不則乃公楛竹輿雪葬萬仞中
將與銅駝玉馬相終始矣始知乏趣袁安閉戶守平安寧是
耳至午下小清涼看般若石修廣五丈任受如許人必不登
牛馬靈異蹟也寺後兩楹絕壁錦堆溪鳴琴筑我極戀此處

可以飲酒緣渡而捫古清涼山無泉脈所云月峰師一咒出
之十八年前曾訂余罕山言俱檀氣今我來思蛛在衲矣低
回拜之而夜大衆皈依梵鼓歡厲松積雪明午夜如月不知
世界之爲靈苻水也爲堯羅錦也次日復下小清涼上金閣
朱薨駕壑貝葉千巖中有立佛數丈最爲無謂然蟲魚篆幡
蘚苔畫座寺不支矣過數里爲普門精舍地新福佛貌精好
中官各欲爭勝則內帑之力可殞崖腹布樓一派餌香客者
雲山妙可層遶卽松徑蒼幽亦有花木深意乃從九龍岡脊
取捷下澗道以螺旋之以狐試之巨石礙天老雪結石驟蹄
把滑人面血素不定就中惡樹怪藤生欺強阻想有山以來
我行第幾人也盼見竹林寺塔人命差有歸著然盤折良久
始得之寺主澄公慧業文人也敕山藪破蓮社唱和數絕便

欲下榻而五臺梁明府訂晤在花園寺去之取道巡檢司先是山中探丸聚慝故有徼兵之設今作穢粉街酒僧博少每混濁名字又臺僧彼此昏嫁習以爲常而伽藍若罔聞之豈佛不校此輩故作平等觀耶花園寺漢明帝所題大孚靈鷲者也西域藤蘭以天眼觀見文殊住此此刹最古梁明府先期左去猶得藉其飲啖寺旣偉盛而中官以金瓦其殿且修無遮齋鐘鳴鼎食魄氣甚張晉大饑數千人走活夜則裸而窟焉蜀僧主之此功德不作未來者也次日登菩薩頂上羅睺寺與西來僧坐語半晌了不異此中人但俱老童子飲水一盂豆七粒耳臺山共一文殊而祈媚者各侈一事羅睺寺曰唐人張天覺見神燈於此圓照寺以爲舍利實惠我真人院則大士現相七日而就塑者下塔院寺則云昔有貧女

牽犬丐食遺髮此間化爲金絲而去總之真幻隨境妄言之而姑試聽之何傷又遷延而至北山寺觀金剛窟門扃不啓相傳三世諸佛五百應真俱有事於內又至三塢等寺環谿疊壑雖多圯廢吾獨喜古佛殘鐘短垣貧衲寒溫一茗絕勝得意髡作野狐態也夕陽將下而紛糝者復丸結矣五臺不能遍登登其極者無如東北次日走北臺之半寒風矢透人僅高葉毒龍元獄望之腦酸遂以華嚴嶺歸宿嶺旣巍峩下視塢院如一脫穎錐又知臺山如五瓣蓮花飯仙山左則青烏氏所謂辨心卷阿者也有大力者負之而趨矣須臾日放而下方正爾其雩暫作天人一會寒甚指泣欲墮黽勉而至法雲寺不啻還家卽衽之快寺乃三昧姑所開國初有華嚴老人誦經木魚達金陵高皇帝循聲而誅其事有神異詔供

之其實盈丈一牕鑿翠萬片芙蓉插入吾又極戀此處可以
讀書山畔古雪大擔肩入無論僧依爲命旣盛夏起居一浣
一條皆雪也惠泉僧狼籍水五臺僧亂用雪恐各禿必有圍
報鄭生聞之啞然亟熱酒茹吾言天風半夜海立漢翻屋瓦
飛裂攬衣狂起而侍童以爲閒事也次日旭暢從華林望東
臺俱晶砂中耕踏雖苦極然何如春明門內色味塵乎由龍
王堂上觀音坪萬山滾蹴似紫濤沸戰釜中各不相下者登
漫天石則鴈塞神京不須決背西華東岱直跳恒山尖一呼
之耳五百里收之瞬睫而臺前萬年冰有培無替遙望碧光
縷縷返照雪心者是所稱紺雪者耶西王母曰仙之上藥有
元霜絳雪要之物老則化不可誣矣五臺同雲惟四月薄謝
餘盡漣漣奕奕之曰也山海經以爲小咸山首空桑之地盛

夏有雪奈何近在屨下而遂逸之文殊三身示化應現有方
掌握恒沙毛吞無盡而骨俗緣輕如飛蓬之子何能窺其萬
一卽輪光燈采妙明圓應商英所旦暮遇者而不得一快觀
不敢誑來茲也惟是寒瘦之性愛雨而貪雪謂雨可以減事
雪可以益心也而茲游也悞入皓冥吸吞元氣恍惚置身於
邃古之初卽八駿之歌黃竹猶其稚元者矣而吾生平之雪
游暢於此故記之

布政司題名記

郭子章

石之有題名也自漢始考金石略蜀文翁禮殿諸學生太尉
劉寬楊震三碑碑陰俱題名顧亦當時屬吏門生姓字耳唐
建中二年京兆府有同官記碑署爵里官方而協恭之雅始
著及宋司馬君實記諫院題名辨忠詐直回而勸戒之義始

凜我明進士釋褐天子命題名太學自是公府官署內而殿閣部院外而司道郡邑俱得題名於石而山西布政司自景泰乙亥豎豐碑至於今凡三易石萬曆癸巳左方伯陸公右方伯萬公大參白公甯公以三吳秦趙名賢共涖茲司跡石不勝書伐石續之而屬記子章子章謝曰職陳臬義不敢越俎遲迥久之陸公遷豫章中丞去萬公遷左轄而右轄李公自巴蜀且至諸大夫日趣之曰石存勸戒義昭是非囿於方者不得言臬君處是非外得盡言相繩惟君之母讓也予惟山西古并冀域唐虞夏之故都也今之藩司唐虞之岳牧也書曰咨四岳闢四門明四目達四聰咨十有二牧曰食哉惟時柔遠能邇惇德允元而難任人四方率服則古岳牧職大抵在廣視聽以辨元壬重食時以綏中外二者而已今藩司

稽一方忠佞佐兩臺歲終有刺三歲有黜陟合郡國錢穀貨賄罔不出內於帑而縮穀之猶然唐虞之遺山以西景霍以爲城而汾河涑澮以爲淵晉代藩以爲國上谷雲中以爲鎮而鴈門岢嵐寧武以爲關天潢樊鄴引脰待火者無慮十千外兵環伺互貨荐易邊鄙軍興日庀糗糒得如舜所云食時率服乎大鹵大同咫尺邊徠民習於悍而不可狎吏才難平水汾潞之間漸失韋藩木楗之舊集四遠方賄以紛於市而餌吏吏守難得如舜所云咨闢明達德元而匪壬乎二者備卽唐虞之岳牧不价於此矣不若是也不可以藩藩不藩在人而令千萬世指其藩不藩而頌刺之也在石吁可愬哉予又稽晉之故矣趙文子爲室劉其椽而礮之因張老之夕令之勿礮也而曰爲後世之見之也其劉者仁者之爲也其礮者

山西通志 卷二百八
不仁者之爲也尹鐸曰委土可以爲師保吾何爲不增壘培
庶曰可以鑑而鳩趙宗乎委土可師石礮不仁予願諸大夫
以趙尹之鑑戒眎茲石也茲石猶晉之委土室礮也諸大夫
瞿然曰善哉子之言晉藩也不出其畛域微獨某也以下寘
之於耳乃今而後官茲藩也其誰不日惕惕焉於晉之故以
爲瑱也

遊晉祠記

蘇惟霖

太原縣南十里晉祠在焉周武王剪桐所封之地也李唐嗣
統祀之爲始祖宋元代剖藩符碑歷歷可指數居民千家烟
火成霧祠踞其中入門渡一小橋垂柳相映流水淙淙已令
人有仙源之想石磴數十級而上金碧錯落奉聖母其中尊
嚴肅穆余顧太原令曰何以不祀唐叔而祀母母且爲誰則

以祠所負之山曰懸甕綿亘數十里山下出泉灌溉環邑委
於汾河土人以爲惠出於母尸視之耳何知唐叔顧瞻久之
而下其左方圓亭所罩則泉源也一泓如洗萬道迸湧雲根
三窟噴雪轟雷無朝昏間其上一亭爲宋紹聖間文公知白
守此疏濬泉源記其事文理質雅筆法遒勁亭下引流入溝
灌輸四走石魚游泳其中不知避人折而右圓亭相峙水從
地上湧輪瀉無聲殿前疊石爲方臺一樹森蔚其中若廣陵
瓊花舊跡周遭四金人怒而立其三皆宋紹聖二年五年物
相傳其一出亾爲本朝弘治年補立年月姓氏鑄記甚明而
儒生不知其幻或以爲僞再折而右遙望雲中碧瓦鱗鱗者
朝陽洞也洞甚洪厥主者以磚石甃其四旁爲牆壁且折而
爲堂房塲平其頂略無石意居然三座無樑梵宇若仍石之

舊而合三爲一其中可容千人上有巉巖下有鳴泉真勝地也洞門二栢大數圍枝擾雲漢聲挾風雨根入地數百尺一瘦大如鼓蓋千年物也稍前數十步三渡流水謁唐叔祠祠左一石前撫蘇舜澤公因母廟日嚴而叔祠日冷也爰修葺之因紀其事綴以登歌之詞門外有碣嶄然則唐太宗貞觀廿年御製祠記手書莊雅石理如玉額式雄古碑陰皆唐宋諸遊者題名雜識轉入水亭俯檻靜觀水底芹藻如淺碧琉璃鮮活欲動游魚若龍不可馴擾飛流碎沫如銀河直落可望而不可親也清風徐來冷沁肌骨徘徊不能去壬子九月十七日篝燈記於清源公署

棲龍潭記

俞時

陽城之東有九女臺臺以左飛嶼壁斷殊岫珠連削如劍立

森若戟攢洞口亂開人跡罕見唯有飛僊可到爾圖畫縈迴燦乎金銀城也而四山之奏兩崖之交伊闕上聳禹門孤懸有怪石不知其幾丈許橫臥促駐於其中雲拳電跳蛇文龜章手拂之滑膩如流脂已爲方外絕秀及轉步下睨得水一泓名曰棲龍潭者蒼然元然清然冷然盤渦伏流竒成自天瓊漿玉液甘可食人大旱祈禱洪霖輒應或以萬石投之咆哮轟轟暗響移時杳莫探其底極君子以爲歸墟之壑也僻邑窮郊誰其爾知如昔賢所品於江南諸水者略弗及之蓋所謂李密未見秦王爾故可以觀才矣俞子同孟子小谿王子及泉登焉竟晚眺賞實難忍割蓋若此潭以予輩相爲知已云

遊砥柱記

都穆

山西通志 卷二百八
砥柱在邠州東五十里黃河中以其形似柱故名禹貢謂導河東至於砥柱卽此乙卯往遊砥柱離州二十里午餐又二十里循河行十里至三門集津三門者中曰神門南曰鬼門北曰人門其始特一巨石而平如砥想昔河水汜濫禹鑿之爲三令水行其間聲激如雷而鬼門尤爲險惡舟筏一入鮮得脫者名之鬼宜矣三門之廣約二十丈其東百五十步卽砥柱崇約三丈周數丈相傳上有唐太宗碑銘今不存蔡氏書傳以三門爲砥柱州志亦謂砥柱卽三門皆未嘗親履其地故謬誣若此又按隋書載大業七年砥柱山崩壅河逆流數十里砥柱今屹然中流上無土木而河之廣僅如三門奚有崩摧而壅河逆流至數十里之遠蓋距河兩岸皆山意者當時或崩遂以爲砥柱而書之也孟子曰盡信書則不如無

書有以哉

孟烈孝祠碑記

曹于汴

蒲之傭民孟端妻邵氏恩早寡不欲奪其志抱幼女亥隕於井八歲女熙墜從之旣出屍母猶抱亥熙抱母閭巷悲感年友綠汀張君輝其里人也爲之傳誦諸王公卿大夫士共掄揚之薦達天朝旌其門且爲建祠樹坊遷墓手錄各檄牒傳詠授余而以祠記屬焉余披玩愴然灑泣曰異哉圭竇婦嬰乃至此乎然妻不負夫子不負母適得其正此常也非異也世有背夫之妻忘親之子則爲異耳末俗以異爲常得不以常爲異哉夫重淵百尺赴之如歸激湍絕命固結不解是孰爲之氣也卽理也循其性之自然之謂道也斯時也精靈粹湛羅貫乾元所謂夫婦知能可以埒聖赤子未失斯爲大人

山西通志 卷一百八
或有岐言理氣析列聖凡高談性命薄視庸常蓋亦未之思
已夫大道渾淪人人具足日用皆是第不知耳顧惟不知乃
爲真用也何也知見起於校量校量乃生蹊徑假令邵知死
夫之爲烈而後死之熙知死母之爲孝而後從之亦何能直
截疑一毫無顧望夾雜也而章縫士人几席跬步或棄大道
而不用奚取於載籍極博或用之而猶知之亦不免利帶名
根其視烈孝何如乎故學無他亦於忠孝廉節日用不知斯
已矣故不識不知爲順則不學不慮爲仁義嗚呼詎易言哉
祠建景虞門下計堂四楹中阿居邵熙亥左右侍大門一楹
建坊額貞烈祠二門一楹外東西小屋二居良姬一以司涓
除啟閉東隅井一便自食剗於郡刺史川南郭公元柱成於
鄴郡孫公好古歷萬曆戊戌庚子方竣云

趙烈婦祠碑記

烈婦姓侯氏安邑李店村侯良宰女蚤孤育於伯父轉育於
所親年十四爲馮村趙良進妻貧爲人傭越兩月而良進病
侍養甚謹又三月而良進卒其母輩將令別適烈婦自縊以
死時萬曆甲午歲之仲夏明經葵南張君表其閭孝廉化城
王君表其墓銓部樸菴劉君題以辭鹽臺侍御璇石曾公誄
以詩移檄嵯司發緩建祠一所堂四楹大門二楹植木主而
祀鄉毗謂可忽玩或寢住其中余結茅其隣瞻拜感歎恐其
久而湮廢爲之塑像以肅觀者夫貧家幼婦非有保姆之教
習見之素五月之夫強半在疚未嘗享其饜飽而一醮不忌
甘死如飴與其敗節而偷生寧一死以全節視改節爲甚恥
視保恥爲甚急生且可捐况區區末利豈與廉恥校重輕哉

乃有圖利欲之便安厭禮義之拘檢喪恥不顧聞烈婦之風當亦忸焉泚其背矣爰述芳蹤勒之貞珉藉以維世云
國朝

老姥掌游記

陳廷敬

上黨南三百里有山曰方山又南十五里曰洞陽山又南十五里曰樊山上黨地形高天下此山高出地上皆直下萬仞由樊山則枝分條披狀形竒詭嶢嶢而爲峰窈窕而爲壑崎嶇而爲峭峻嶒而爲嶽截嶄而爲嶽峩嶩而爲巒嶺嶒而爲岫蓼郭而爲巖其又南則砥柱析城岩壁重複峭竦如樓堞嵯峨如墉隍如玦如環繚絡數百里其中長川夾岸若斷若連如海波斂而島嶼出如江湖平而洲渚生村居靜深關扃奧闕蓋陟樊山之巔皆見焉余家樊溪東浹在山之南開門

見山測以圭景南北相峙不失杪忽則仰觀夫樊山之爲狀也如仙卿冠帶而立其上又如鯨張鱗如鳳舒翼委蛇而下而其東則如巨靈奮臂隱然信其指爪上捫太清下揮空曲有曰老姥掌者向所謂峰焉而嶢嶢壑焉而窈窕峭焉而崎嶇嶺焉而峻嶒嶒焉而嶽嶽巒焉而峩嶩岫焉而玲瓏巖焉而蓼廓數十里之內聯嵐巨暉俯可搏擷如置諸掌昔以掌名肖其形矣信異境矣哉其下則古松流水渺然非復人間余時游而樂之蓋嘗數宿而不能去也夫去山數十里而近而峰壑巖巒之美已如此况所云數百里者吾雖未能盡游焉而已坐挹河山之勝他日雖得盡游其處亦何以加於此樂也與

東湖記

儲方慶

士之受朝命從官於四方者宣力之暇亦得因其地之山川
寓意於遊觀以爲後世美談昔賢如任昉元結杜牧王禹偁
蘇軾出典郡邑胥有登臨遺蹟見於詩歌或覽其形勝創爲
亭榭垂諸不朽雖千百世之下猶得想像其遺風而思樂之
然皆順民之利以自托於修建功成而後享之然後以文章
鳴其意故其書可傳而其地可久也異哉清源之有東湖何
其異於古所云耶湖居邑東偏計城市廣狹湖得其二焉父
老爲予言縣故無湖湖所占者悉平壤曩時白石水漲不以
時疏導悉歸城東窪下處外障於垣墻而內益以泉水故水
日聚而成湖蓋此湖之滙爲巨浸者七八十年於茲矣居民
樂其有魚鼈之利潛泳游行於中而令長之來宰茲邑者又
以西北少水泉之美輒快意於茲湖以爲一隅勝也遂從而

文飾之以爲遊觀之所然而傍湖城垣受水冲激崩塌無完
土西岸水侵民居日毀壞每歲夏秋交山水暴發於外湖水
汜濫於中則市無行人居無燥土惴惴焉有沉溺憂然則東
湖之在清源有微利而亦有巨害守斯土者見其侵齧之勢
當戚然以憂有食不下咽之慮而又何暇對景怡情作爲詩
篇垂之邑乘耶予以

今上十四年孟春來守茲土旣受事數月凡境內山川風土悉
身歷之而東湖在臥榻傍尤所昕夕展對者故其地形之高
下茲湖之本末考之至晰籌之至熟方將用南方之桔槔盡
發湖水於城外使內水有所去修西面護城堰障白石口使
外水不得入然後繕完城郭整理廬舍使清邑不至湮廢而
胥阻於時會未可遽行延及戊春吏事少暇將伸本志而

山西通志 卷一百八
朝命賁臨亟去茲土遂使三年中神畫指數將爲清土千百
年計者不獲一啓其端輒委之而去是誠予之誓也夫然而
東湖之名業已載在邑志作爲咏歌竊恐後之君子不察茲
湖之有害且非天地生成之水乃山河流漲所積不可不早
爲放洩以存茲邑一撮土者而徒事目前之美觀頓忘守土
之大計則凡涖茲邑者胥不免於讐戾而予亦列其中矣故
敢筆之於篇以待後之君子云爾至於山水映帶之妙魚鳥
花月之情昔賢述之詳矣予又何辭焉

重修運城碑記

張鵬翮

河東御史臺與鹽法使者所駐之地曰運城專城也淮浙長
蘆鹽司皆隸郡衛非專城其故何哉蓋煮海烟竈延綿沙際
防禦增築之事府州守令任之河東鹽池百二十里專屬鹽
務官管轄冀豫雍梁四千里民食仰給於此國賦所儲羣商
所處諸路所通百物所聚去郡治旣遠而解州安邑又城小
不足以容城之特建其勢然也城周垣九里四門計一千七
百丈肇始於元迄今三百餘年其間或修或圯前使者勞績
猶在

皇上御極二十三年河東鹽使需人

上命舉清廉素著者廷臣謬以鵬翮上聞

制曰可恭遇

聖駕東巡臨視闕里鵬翮祇候充郡

特蒙召見承

恩扈蹕仍留典山東武鄉試事竣之官覈引通鹽恤商利民先
舉其綱閱池濬渠厚塲修城尤爲緊要方將次第行之栢臺

李公請

旨之檄已下於是捐財用而不費公帑稱畚築而量給民力平
板幹仍溝洫鳩工命日程物興作制不踰舊役不違時始於
康熙二十四年九月明年三月告成凡墉堞皆甃甃甃樓櫓
皆堊丹漆曩之卑者崇狹者廣傾者植頽者完落成之日登
埤四覽竊有感於懷焉夫鹽政無修城之責然運城廢興乃
鹽事大政必際其時得其人始可事治而政舉嘗南望中條
矗立屏障接連行陁介山北峙峩嶺環抱汾澮襟其東黃河
帶其西城之險阻可憑也賈旅輻輳僨販雲集駟蹄擊互雜
糅於闐闐間者敏關警櫜不可以無稽池之旁大舜之琴臺
在焉歌南風之詩遐想乎上世自禹營安邑三代而下牧民
固圉皆以城郭爲先務故周文王作城於朔方而以南仲宣

王作城於東方而以仲山甫盛世君臣於爲國之本末先後
皆有條理吾故曰必際其時得其人然後事治而政舉也今
天下車書大同

聖天子誕敷文德協和風動治益求治安愈思安日與公孤坐
而論道猗歟休哉可謂際其時矣我柱史勒公以覺羅奉命
來巡圖公以閣學出撫三晉河道觀察於公擢撫畿甸江南
中丞湯公晉秩宗伯皆蒙

聖朝不次之用卽大小百執事罔不感發興起刻自砥礪以自
効於

盛世海內額手慶得人焉予萬里孤臣荷
特達之知簡拔督鹺勉循分以盡掌筴理財之實去其不
便而行其便慎修厥政期於有成以對揚

山西通志 卷二百八
休命豈特修城一事已哉然予因補敝葺廢修扞一方有慕南仲仲山甫之功而予則愧非其人也有負於

聖天子委任之至意多矣遂爲文鏤諸城隅以告後來者

游晉祠記

朱彝尊

晉祠者唐叔虞之祠也在太原縣西南八里其曰汾東王曰興安王者歷代之封號也祠南向其西崇山蔽虧山下有聖母廟東向水從堂下出經祠前又西南有泉曰難老合流分注於溝澮之下溉田千頃山海經所云懸甕之山晉水出焉是也水下流會於汾地卑於祠數丈詩言彼汾沮洳是也聖母廟不知所自始土人遇歲早有禱輒應故廟特巍奕而唐叔祠反若居其偏者隋將王威高君雅因禱雨晉祠以圖高祖是也廟南有臺駘祠子產所云汾神是也祠之東有唐太

宗晉祠之銘又東五十步有宋太平興國碑環祠古木數本皆千年物酈道元謂水側有涼堂結飛梁於水上左右雜樹交蔭希見曦景是也自智伯決此水以灌晉陽而宋太祖太宗卒用其法定北漢蓋汾水勢與太原平而晉水高出汾水之上決汾之水不足以拔城惟合二水而後城可灌也歲在丙午二月予游天龍之山道經祠下息焉逍遙石橋之上草香泉冽灌木森沉儵魚羣游鳴鳥不已故鄉山水之勝若或睹之蓋予之爲客久矣自雲中歷太原七百里而遙黃沙從風眼眯不辨川谷桑乾滹沱亂水如沸湯無浮橋舟楫可渡馬行深淖左右不相顧鴈門勾注坡陀阨隘向之所謂山水之勝者適足以增其憂愁怫鬱悲憤無聊之思已焉旣至祠下乃始欣然樂其樂也由唐叔迄今三千年而臺駘者金天

氏之裔歷歲更遠蓋山川清淑之境匪直游人過而樂之雖神靈窟宅亦馮依焉而不去豈非理有固然者與爲之記不獨志來游之歲月且以爲後之游者告也

文水縣卜子祠堂記

孔氏之徒身通六藝者七十子子貢以夫子之言性與天道不可得聞而曾子以魯得之至論文學必曰子游子夏孔子既沒曾子之學羣弟子或未之篤信獨以有若爲似聖人而子夏居西河西河之人亦疑之於孔子若二子者將不得爲具體者與徐仿之言曰詩書禮樂定自孔子發明章句始於子夏蓋自六經刪述之後詩易俱傳自子夏夫子又稱其可與言詩儀禮則有喪服傳一篇又嘗與魏文侯言樂鄭康成謂論語爲仲弓子夏所撰特春秋之作不贊一辭夫子則曰

春秋屬商其後公羊穀梁二子皆子夏之門人蓋文章可得聞者子夏無不傳之文章傳性與天道亦傳也是則子夏之功大矣而戴氏禮載曾子之言以疑於夫子罪子夏夫曰有子之言似夫子曾子聞之子游未之怪也其不從羣弟子彊者特以事之不可耳後世拘儒疑其說於廟庭之祀黜有若而進子張又或謂西河不當專祀子夏由其過信曾子之言而未之繹也抑何其刺謬與文水固當日西河之境也隱泉山之麓舊有子夏祠歲在丙午秋八月子獲拜祠下縱觀昔人碑記往往僅志土木廢興及歷代封秩而已至其發明章句傳孔氏之學爲西河文教所自始顧不及焉私心竊以爲憾夫山水亭臺之勝卉木之華其有歷久不廢者游人過之尚或覽物而賦詩或題名鑱石其處况夫瞻先賢之祠宇卒

無一言暢其旨其何以祛世儒之惑則後死者之過也爰綴舊聞爲記亦以見戴記所載殆非曾子之言而六經之傳子夏之功尤多報祀之義蓋非獨西河之人宜然矣

遊中方洞記

趙三麒

武邑東九十里爲龍門山介黎城者爲中方洞皆有勝蹟所稱太行羊腸翠微是也辛酉秋有事西成於韓壁約傅生仲宣爲東山采藥之行傅越人也精於醫蚤發過柳塘不五里至山麓井社蕭條一望石田低回者久之過此綠陰紅雨山色漸竒芬芳之氣時襲人衣由龍門而躋直造其巔東望五峰雪浪其最高者行三里爲韓家巖巖有三洞中曰雙泉二水分流滌洞左右而得名也壁間石眼玲瓏琅琅有聲余署曰語石亦曰惟韓陵片石猶可語耳忽雨至過羊徑山邑志

所謂路僅通羊者今可方軌土人云勝國奉勅修尚書劉公墳伐石此山有修路碑記過此則黎城縣界矣穿峽踏水冒笠數里始抵陽河雨亦稍歇時已暮炊高眺白雲橫起山腰倏忽千變如蜃樓海市狀黎明起舍騎扶筇所經野菊如繡中有藍菊名曰翠連環余曾遊廣陵萬菊園未見此種移根籬東可助陶愛極目西峰有石千尺如門又如兩旗對展沿林盤曲不別天地鳥道石蹬歷千百級忽然開朗擇平石憩飲頰前山之最高者今皆在壑中矣自是益北望中方樓閣如畫竒蹟怪狀不可指名傅生云某爲某藥可採可茹南北藥之不同如是過伏虎崖乃抵大巖巖深數丈位毘盧佛殿中淋泉滴滴昔人題爲念佛泉右爲三教堂止釋道二像僧曰孔聖像三成三毀想聖人不欲居山耶余曰爾獨不知太

行爲孔子回轍處乎既還轅而息鄴矣又奚以留像於斯其最高者爲中方讀斷碣云山在太行之中故曰中方諸山純石截震而上諸水如磬截震而下故其境爲最勝上一層爲丸封洞高七尺許濶稱之列炬以導門隘徑滑不可入半崖爲磐安洞可容五六百人土人避兵於此旁石如砥爲三仙臺有二石室辟穀者居焉北爲生生洞山無寸土惟此洞中黃泥一線生生不窮造諸佛殿取給於此左爲俯觀潞郡譙堞歷歷在指顧間山後萬乳齊下爲雨玉處其巔爲捧天崖對面爲金蓮峰昔年曾開金蓮花光映百尺香聞十里日夕而旋食於岑樓老臘進百花茶詢其產曰卽在此山中葉細花白而味甘每枝分莖數叢百花齊開故云吾邑龍門山此種繁甚土人不識持歸以示之再憩陽河登白坡四望霽色

大非昨雨中景况竒峰如筆如掌如蓮華秀出天表五雲磅礴極目皆幻乃知太行鍾靈於此冀南一帶名賢文學代有偉人其得於岳靈者厚耳予浪跡三十載每爲萬里行岳有五僅遊其三海有四僅觀其二物不可以終窮故以未濟終焉

文端吳先生祠堂記

聖人寶大位八柱擎天四時成歲實維阿衡超千祀而挺生奉百世而特立者也銅鞮叔向賢於子產房魏佐命實由沁造自李成公以來文端先生一人而已伏讀

御賜臨米千文後題吳大學士持已清潔朝中之事面折廷爭必得其正

聖懷發言與舜之命禹子違汝弼同鄒聖所謂格心正己之大

人也歷試諸艱從容合道故爵品以貴之章服以榮之坊額以表之易名以重之其立朝大節督楚徽猷固國史之所詳茲可略也於鄉孝友因心子惠濟物凡親而貧疏而賢者咸分惠焉乙亥丙子連歲大饑斗米千錢道殣相望先生時在楚聞之傾橐中所貯俸若干金寄糴賑救全活無算溝中之瘠今得爲太平民者先生之惠也州小賦繁康熙二十八年造簡明賦役全書有欲增沁屬糧銀一千三百兩者先生致書藩司布公俾請題正一州如是天下如是回天之力非公莫可凶歲子弟失業率困於供給至連數村亡絃誦聲不仔肩鄒魯則肝胆秦越歷數十科鄉試無中式者幸先生勸讀課文或助館穀或授經書或資筆楮於是窶人志士疆學立行羣相告曰公不負

天子不負所學吾儕安忍負公也迄今舉孝廉捷南宮者異於恒授非先生栽培何以及此官居鼎鼐門僅旋馬三捐儉贖大修孔子之宮并訂正禮樂俾諸生習而俎豆之文中鄒子之鄉可以觀矣諸凡郡之橋堞廟社有益於民生者亦多所補葺斯固神明之靈貺後來之聳慕者已愛流爲海情塵爲岳民到於今稱頌先生之德不衰士庶呈請公建專祠二所用崇報祀一在先生故居徐村月嶺之陽一在郡城興文街之北湧卮穹堂邃廡崇樓齋廬庖湏以次落成卽捧御筆思誠堂榜額北斗西銘諸聯懸之簷楹榮置先生神位於

中而尸祝如在重門中閤啓閉以時過者祇肅郡紳劉子奕昌李子廣生牛子維垣等屬三麒麟文麗牲之石麒麟謝不敏稍以耳目所覩記者書之見斯民之直道諸君子尊賢樂善

之美夫經天緯地之謂文中立不倚之謂端先生忠義之氣
發而爲文章立德立功立言則爲星爲嶽爲神賴及萬方澤
被百世豈僅峴山墮淚汝水流膏也哉爰綴樂歌三章以侑
神焉其辭曰擗蕙櫨兮啓瓊宮撫彗星兮清塵朦款徐陵兮
儼在蹇亂柳兮忡忡望長安兮紅日近佩蒼景兮御清風風
飄飄兮吹搖草神之格兮降穹昊右迎神吹笙兮款美合陳兮
簞簋翳華芝兮驂赤螭披明月兮佩劍履警如鐘兮若有聞
舞山香兮千林喜援貞吝兮憇悔靈連蜷兮容止高唱奏假
詩滿斟方諸水右降神樂闋兮移情日沉兮思明胷索潤兮紅
雨玉箸調兮青精騰而升兮雲之際憺左右兮依上帝水有
璜兮山有金扇仁風兮消六沴忽而逝兮接冥茫

御筆懸兮有夜光聖鼓淵淵兮是宜是饗月嶺昭昭兮彌熾彌

昌右送神

遊金粟園記

孫籀

金粟園故河東郡王作也戊子之夏偕二客往遊甫啓關而
見有巍然傑出壯麗駭目者金粟坊也稍折而西砌徑迂迴
桂藜軒與歲寒居相接高敞開豁迴廊環抱綠牕朱戶不減
紗厨爲昔日讀書之處扁之曰西園翰墨林也由故道而之
東橫架小坊粉題蒼雲塢籬傍竹樹交加禽聲上下風自林
出花香襲人過此則蒼苔曲檻滿目皆綠肥紅艷則羣花之
盛開也向南而聳峙作一園之冠者爲丹藥院簾捲明月牖
納清風夏日之所宜名人之題詠尚歷歷可誦也厥後爲有
斐堂與前相稱傍列香雪塢懶雲窩則元邃奧窅爲冬日之
所宜也對丹藥院而臨流北瞰者爲澄然樓週圍羣峰秀出

鳥道層幽位置鬼巧劃落天成或嵌空而玲瓏或坦腹而驤首俱堪呼兄下拜令人坐臥其間想見當時歌兒舞女之所從遊樂而忘返雖平原十日猶未足爲多也樓之下爲金魚池中亘一小橋垂楊密布濃陰四合水深尺許遊魚之往來出沒鬚鬣可數也又步轉而之深林槐角倒垂枯松斜掛隱隱有水聲者爲流觴曲水石棹依然當日騷人墨客之酣飲狂歌地也坐未幾而見一怪樹崛起老狀離奇下倚一大石披荆而視之楷書古木蒼烟吳郡顧願筆也東望數畝開畦種蔬四時之鮮無所不備一逕微通過錦雲鄉富春亭二榭皆宜風宜月宜雨宜晴遊屐告倦可以少憩於此也凝睇遙望忽有岡陵葱鬱高如二丈許而其上之樓臺殿閣映掩於樹木陰森之中令人作天際想曳裾而登草莽之內若隱若

現爲清涼界石西面而屏峙者爲槐陰亭規模弘麗其間題詠如林惜目力無餘未獲遍覽其勝吾大中丞成之力而門下籀實左右之者也行見勒鍾鼎濟鹽梅以開闢元老爲理學儒宗人才之盛不其與三代並茂哉

綜勝記

武全文

仇猶北三十有六里爲春秋時程嬰藏趙孤所者曰藏山山環澗繞南北兩崖削而爲壁者二曰繡屏曰凌空崖壁間懸而爲洞者四曰東洞曰藏身洞曰龍洞曰南洞挹而爲泉者三曰飛瀑曰龍潭曰澗道秩而爲祠者四曰文子廟曰報功殿曰啓忠祠曰表孤祠高而爲門及樓者二曰南天門曰飛巖樓錯而著名者五曰洞壑曰龍池曰垂壁曰柱笏峰曰避靜巖繡屏壁在柱笏峰之陰南澗及洞剖其陽屬南崖文子

廟在南北之中東洞直其東屬兩崖龍洞在北崖之上龍潭
滙其中屬上崖報功殿在北崖之下藏身洞隱其右屬下崖
啓忠祠泊表孤祠在北崖之半洞壑龍池垂壁夾其旁飛巖
樓在凌空壁之下避靜巖踞其西屬中崖上崖由南天門東
折而北中崖由磴道北折而西南澗由澗道泉西南折而東
繡屏者翠繡欲浮對峙祠前如屏也凌空者北崖一帶奇壁
削成如凌天際也藏身者程侯攜孤兒棲身此洞石堵纍纍
猶在也龍洞者石龍中踞空殼玲瓏鱗甲畢具盤立泓潭者
數尺也東洞者巖盡洞懸廓然以深積石叢苔可掬也南洞
者洞邃潭渟迴臨南澗可巢巖峻處也飛瀑泉者東洞瀑布
或注或零三時飛雨冬則冰懸滿洞也龍潭者龍洞仰面珠
璣錯落下澗爲潭澄如也澗道泉者泉水出澗道北取弗竭

用弗窮也祀文子者德澤永垂春祈秋報水旱必以告也報
功殿者旌忠表烈追崇程嬰曰忠智侯公孫杵臼曰成信侯
也啓忠祠者尊文子所自出祀成季宣孟與莊子也表孤祠
者肖真孤與假孤其中一表遺跡於當年一慰他兒於地下
也洞壑者兩崖窮處劃然中斷週迴如洞屋也龍池者洞壑
東注疊滙爲池旱決則興龍致雨也垂壁者壁間有壁斤琢
蹲踞特垂巖畔也南天門者列障成圍迴合無路南天一闕
如門也飛巖樓者削崖千仞飛樓軒舉半覆崖下也柱笏峰
者南峰如笏北向拱立與飛樓相應也避靜巖者飛巖西另
闕一界丹嶂環羅塵跡所罕到也崖不一而北崖爲最奇洞
不一而龍洞爲最靈祠不一而春秋至今爲最古入其谷天
地闊日月幽如出人間世焉窺其崖光怪離奇陰晴萬狀可

望而不可卽焉禮其遺祠歷其洞屋流泉使人心神肅穆耳目滌岩高望遠志而不能已焉嗚呼勝矣

忠烈祠碑記

劉弘遇

粵惟我

太祖開國鍾白山黑水之靈崛起東都斯時也龍驤虎賁之士翕然響應及

太宗嗣位分六曹置翰院禮賢下士余得攀附焉

今上承乾啓運混一區宇遴才分任使余于冀北叅知政事歷半載又使布政全陝三載考績再使撫巡江南戊子歲姜逆倡亂雲中羣孽弄兵三晉鴈門內外悉無堅城

天顏震怒赫然遣師用張撻伐遂爾底定先是師未至而狗彘輩開門揖盜者比比獨諸君五十餘人堅壁奮戟致身不顧

視死如歸真與臧洪同日誓不俱生嗟嗟功烈亦云盛矣時余在江南聞之不勝贊歎以爲報禮重入人深者先見于茲庚寅奉

璽書撫晉始得詳識諸君事越歲

天子嘉其勤死事予贈廕隆祭葬此

朝廷報功之典獎勸之義若斯其至矣余泣茲土敢不敬颺休命以妥諸君子靈乃謀諸同事曰非忠無臣非孝無子歲久人遠恐湮厥祀欲與諸子大夫祠祀之言一倡而忻然樂助者醵千餘金以四百金構基址四百二十七金易丹漆木石六百七十一金給工梓塗丹獲負木石者遂大葺祠于省之西垣其董役事共推能於驛道祝君首任焉由是三月度上四月竣工不二時而觀成祠之堂正五楹兩廡十楹中有拜

聽三楹儀門大門各五楹規模嚴翼體制咸宜僉議香火需
 人復於西隙構退廳七間靜室三間延羽士朝夕侍之又以
 二百十金置地畝歲徵其租以供祠祀蘋藻及養羽士庶厥
 成可觀而可久余因謂忠貞之報百二十金足矣

**祖宗養士之隆所繇致也由斯為記開疆盛烈以傳天下後世樵
 童芸叟之口於不朽云**

山西通志卷第二百八

